

# Chidanda: Bible for Johan

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



# Johan

## 1

<sup>1</sup>Pakutanga laivapo Izwi, ne Izwi lainga naMwari, neIzwi laiva Mwari. <sup>2</sup>Waiyapo pakutanga naMwari. <sup>3</sup>Zviro zveshe zvakasikwa kubudikidza ndiye, ngepabanze pake paiwa pasina chiro nachimwe chakasikwa cheizvo zvakasikwa<sup>4</sup>Paari painga noupenhu, upenhu kwaiva kujeka kwavanhu. <sup>5</sup>Kujeka kunojeka muchidima nechidima achizi kukudzima. <sup>6</sup>Kwaiwapo munhu wakatumwa ndiMwari, zina rate raiva Johani. <sup>7</sup>Wakauva kuita chapupu, kuti upupure ngokujeka, kuti vanhu vese vatende kubudikidza ndiye. <sup>8</sup>Iye waiva asiriye kujeka, asi wakauia kuti apupure ngokujeka. <sup>9</sup>Kaiva kuri kudjeka ko shokwadi, kunodjekissa varume vese, arikuguma munhika. <sup>10</sup>Waiva munyika, nenyika yakasikwa kubudikidza ndiye, asi nyika aizi kumuziva. <sup>11</sup>Wakauya munezvake, nevanhu vake avazi kumuashira. <sup>12</sup>Asi kwawari veshe vakamuashira, avo vakatenda muzita rake, wakavapa simba rokuti vaite vana vaMwari; <sup>13</sup>avo vasikazi kubarwa ngengazi nokuti ngokuemura kwenyama nokuti ngokuemura kwomunhu, asi vakabarwa ndiMwari. <sup>14</sup>Neizwi wakaita munhu, wakagara pakati pedu, nesu takaringira uthende hwake, uthende huri hwouwo wakabarwa ega ndiBaba, akazara ngenyasha negwinyiso. <sup>15</sup>Johani wakaita chapupu ndiye, akadaidzira echiti: “Uyu ndiye wendakareketa ndiye kuti: ‘Uwo unouya sure kwangu mukuru kupinda inini ngokuti waiyapo ndisati ndaapo.’” <sup>16</sup>Kubva mukuzara kwake isusu teshe takaashira, nyasha padera penyasha. <sup>17</sup>Ngokuti mipango yakapuwa kubudikidza ndiMosi; asi nyasha negwinyiso zvakaapo kubudikidza ndiJesu Kristo. <sup>18</sup>Akuna naumwe wakamboona Mwari; Mwana ega, uwo unogara paditi raBaba, ndiye wakamuita kuti aziikanwe. <sup>19</sup>Neichi ndicho chapupu chaJohani, apo vaJudha vakatuma kwaari vapristi nevaRevhi kubva Jerusarema koomubvunza kuti: “Uriyani iwewe?” <sup>20</sup>Naye wakatenda, aazi kuramba, asi wakatenda echiti: “Inini andinipi Kristu akadi.” <sup>21</sup>Navo vakamubvunza vechiti, “Wati kudini? Uri Erija here?” Naye wakapingura echiti: “Andiriyepi.” “Uri muprofeti here?” Naye wakapingura echiti: “Haiwa.” <sup>22</sup>Ndizvo vakati kwaari zvino: “Uriyani? Tipingura kuti tione chokoopingura avo vakatituma. Unotinyi iwewe pachako?” <sup>23</sup>Wakati: “Inini ndini izwi roundaidzira mushango echiti: ‘Ruramisai njira yaMambo,’ kudai ngezvaakaronza Isaya muprofeti.” <sup>24</sup>Zvino vaiya vakatumwa kubva kuFarisi. <sup>25</sup>Navo vakamubvunza, vakati kwaari: “Zvino ngenyi wechibhabhatidza, kuti usiri Kristu nokuti Erija nokuti uwo muprofeti?” <sup>26</sup>Johani wakavapingura echiti: “Inini ndinobhabhatidza ngemvura; asi pakati penyu panoema uwo womusikazii, <sup>27</sup>Ndiye uwo unouya sure kwangu, wendisikasisiri inini kuti ndisunungure rusinga rwegwada rake.” <sup>28</sup>Izvi zvakaaitika muBhethani seri kweJorodhani, apo paaibhabhatidza Johani., <sup>29</sup>Nechimangwani aona Jesu echuiya kwaari, wakati, “Ringirai, Kagwai kaMwari kanodusa kushaisha kwenyika!” <sup>30</sup>Uyu ndiye wendakareketa ndiye kuti: ‘Sure kwangu kunouya munhu uri mukuru kupinda inini, ngokuti waiyapo ndisati ndaapo.’” <sup>31</sup>Inini pachangu ndaiya ndisikamuzii; asi ngendaa iyi ndakauya ndechibhabhatidza ngemvura kuti apangidzirwe kuvaIsuraeri.” <sup>32</sup>NaJohani wakaita chapupu echiti: “Ndakaona Mweya wechidzaka kubva mudenga wakadai ngenja, ukagara padera pake. <sup>33</sup>Inini pachangu ndaiwa ndisikamuzii; asi iye wakandituma kuti ndibhabhatidze ngemvura wakati kwendiri: ‘Uwo wounozoona Mweya wechidzaka nokugara padera pake, uyu ndiye unobhabhatidza ndiMweya Wakachena.’” <sup>34</sup>Neni ndakaona, ndakapupura kuti uyu ndiye Mukororo waMwari.” <sup>35</sup>Nechimangwanizve Johani waiya akaema nevairi vevadzidzi vake; naye aona Jesu echihamba, wakati: “Ringirai, Kagwai kaMwari!” <sup>36</sup>Vadzidzi vairi vakamuzwa echiereketa izvi, vakateera Jesu. <sup>37</sup>Jesu wakakunukuka, akavaona vechimuteera, akati kwavari, “Munotsvakenyi?” Vakati kwaari: “Rabhi (ukwo kunoti ngokukumuchwa, Mudzidzisi,) unogara pari?” <sup>38</sup>Wakati kwavari: “Uyai muone.” Ndizvo vakauya vakaona apo paaigara, nawo vakagara naye zuvaro. Raiya rooda kuita awa rechigumi. <sup>40</sup>Umwe wevairi avo vakazwa Johani echiereketa, akamuteera, waiya Andreu, munun'una waSimoni Petro. <sup>41</sup>Iye wakatanga kutsvaka mukoma wake Simoni, akati kwaari, “Tamuona Mesia” (ukwo kunoti ngokukumuchwa, Kristu.) <sup>42</sup>Naye wakamuunza kunaJesu. Naapo Jesu amuringira wakati, “Iwewe ndiwe Simoni mukororo waJohani. Unozodaidzwa kuti Khefasi” (ukwo kunoti ngokukumuchwa, Petro.) <sup>43</sup>Nechimangwani wakada kuenda Garire, wakaona Firipu. NaJesu wakati kwaari: “Nditeere.” <sup>44</sup>Zvino Firipu waibva Bhethisaidha, dhorobha revaigara Andreu naPetro. <sup>45</sup>Firipu wakaona Nathanaeri, akati kwaari: “Tamuona uwo waakanyora ndiye Mosi muMipango nevaprofeti, Jesu weNazareth, mwana waJosefa.” <sup>46</sup>Nathanaeri wakati kwaari: “Kungabvawo chakanaka muNazareth here?” Firipu wakati kwaari: “Uya uone.” <sup>47</sup>Jesu wakaona Nathanaeri echuiya kwaari, akati ndiye: “Ringirai muIsuraeri wegwinyiso, usina kuchengedza mukati mwake!” <sup>48</sup>Nathanaeri wakati kwaari: “Wandiziira pari?” Jesu wakapingura akati kwaari: “Firipu asati akudaidza, uri pashi pomuonde, ndakakuona.” <sup>49</sup>Nathanaeri wakapingura akati, “Rabhi, iwewe uri Mukororo waMwari! Uri Mambo waIsuraeri!” <sup>50</sup>Jesu wakapingura, akati kwaari: “Ngokuti ndati kwouri, ndakakuona uripashi pomuonde, unotenda here? Unozoona zviro zvikuru kupinda izvi.” <sup>51</sup>Wakati kwaari: “Ngegwinyiso ndinoti kwomuri, munozoona denga rakabeuka nengirosi dzaMwari dzechikwira nokudzaka padera poMwana woMunhu.”

## 2

<sup>1</sup>Ngezuya rechitatu kwaiyapo muchadho muKhana reGarire, namai aJesu vaiyapo. <sup>2</sup>Jesu wakakokwawo nevadzidzi vake kumuchadho. <sup>3</sup>Naapo vhini rapera, mai aJesu vakati kwaari: “Avachina vhini. <sup>4</sup>NaJesu wakati kwaari, “Chinenyi ichi kwendiri nokwouri, mai? Awa rangu arisati raguma. <sup>5</sup>Mai ake vakati kuvashandi: “Kunyazwi chiinyi chaanoronzwa kwomuri, itai.” <sup>6</sup>Zvino aiyo mabiya emapuwe matanhatu emvura kudai ngomuitiro wavaJudha wokushamba, rimwe ngarimwe rapinda nhuvi mbiri nokuti nhatu. <sup>7</sup>Jesu wakati kwavari: “Zadzai mabiya ngemvura.” Navo vakaazadza kuti

penu. <sup>8</sup>Naye wakati kwavari: “Cherai zvino, muende nayo kunenhunge yomuchadho.” Navo vakatora vakaenda nayo. <sup>9</sup>Naapo nhunge yomuchadho yaraira mvura iyo yakapindudzwa kuita vhini, isikazi kuzia kuti rabva kuri (asi vashandi avo vakachera mvura vaizia), nhunge yomuchadho yakadaidza mukwambo, <sup>10</sup>nayo yakati kwaari: “Munhu weshe unobudisa kutanga vhini rakanaka; naapo vanhu vamwa kakurutu, unobudisa iro risikazi kunasa kunaka; asi iwewe wakangwarira vhini rakanasa kunaka metsa zvino.” <sup>11</sup>Jesu wakaita uyu, mushamiso wake wokutanga, muKhana reGarire, wakapangidzira uthende hwake; nevadzidzi vake vakatenda kwari. <sup>12</sup>Ngesure kweizvi wakadzaka kuenda Khapernaume, iye namai ake nevanunguna vake nevadzidzi vake; navo vakagarapo mazuva asikazi kuwanda. <sup>13</sup>NePhasika revaJudha raiya repasinde, naJesu wakakwira kuenda Jerusarema. <sup>14</sup>Naye wakaona muTemperi avo waitengesa mwombe, makwai nenjia, nevaitenganisana mare vakagaramwo. <sup>15</sup>Naapo aiya aita swepu, wakavadzanga veshe kubva muTemperi, zveshe makwai nen’ombe. Wakadurura pashi mare yavaitenganisana, akapinduridza matafura avo. <sup>16</sup>Naye wakati kuneavo waitengesa njia: “Dusai izvi zviro kubva pano Musaita mhatso yaBaba angu mhatso yokutengesira” <sup>17</sup>Nevadzidzi vake vakakaradza kuti kwakanyorwa kuti: “Kutsamwirira ngendaa yemhatso yako kuchandipedza.” <sup>18</sup>Ndizvo vaJudha vakamupingura, vakati kwaari: “Muoniso wenyi woungaita kutionisa kuti unesimba rokuita izvi zviro?” <sup>19</sup>Jesu wakapingura, akati kwavari: “Putsai iri Temperi, ndinozorimirudzazve ngemazuva matatu.” <sup>20</sup>Ndizvo vaJudha vakati: “Temperi iri rakaakwa ngemakore makumi marongomuna namatanhatu, newe ungarimirudza here ngemazuva matatu?” <sup>21</sup>Asi iye wakaereketa ngendaa yetemperi romuiro wake. <sup>22</sup>Ndizvo apo amuswa kubva kwevakafa, vadzidzi vake vakakaradza kuti waiya akaereketa ngeichi; navo vakatenda zvakanorwa neizwi iro raakaereketa Jesu. <sup>23</sup>Zvino apo aiya muJerusarema padhiri rePhasika, vazhinji vakatenda zina rake apo vaona mishamiso yaakaita. <sup>24</sup>Asi Jesu aazi kudzipira kwavari, ngokuti iye waizia vanhu veshe <sup>25</sup>waiya asikatami naumwe kuti apupurire kwaari ngendaa yomunhu; ngokuti iye waizia emene izvo zviro mukati mwomunhu.

### 3

<sup>1</sup>Zvino painga munhu wevaFarisi, zita rake ndiNikodhemusi, mutongi wevaJudha. <sup>2</sup>Uyu munhu wakaenda kunaJesu usiku wakati kaari: “Rabhi, tinozia kuti iwewe uri mudzidzisi wakabva kunaMwari; ngokuti akuna naumwe ungakona kuita iyi mioniso younoita, kwegu kuti Mwari arinaye.” <sup>3</sup>Jesu wakapingura, akati kaari: “Ngeshokwadi ndinoti kwouru, kudai munhu asabarwa ngokwomudenga, aakoni kuona umambo hwaMwari.” <sup>4</sup>Nikodhemusi wakati kwaari, “Munhu ungaita mabarirwenyize apo aamusharuka? Ungakona here kuti apotere ngokwechipiri mundani yamai ake, abarwezve?” <sup>5</sup>Jesu wakapingura echiti, “Nge chokwadi, chokwadi, ndinoti kouri: kuti munhu asabarwa ngemvura noMweya, aangakoni kupotera muumambo waMwari. <sup>6</sup>Uyana unobarwa nge nyama inyama, unobarwa nge Mweya mweya. <sup>7</sup>Usha shamaswa ngokuti ndati kwouru: ‘Kunosisira kuti ubarwezve. <sup>8</sup>Mututu unovhuvhuta peunoda, newe unozwa chaungira charo, asi auzii perinobva neperinoenda. Zvakadaro kavari veshe vanobarwa ngomuMweya.’” <sup>9</sup>Nikodhemusi wakapingura, akati kwaari: “Izvi zvingaita maitikirenyi?” <sup>10</sup>Jesu wakapingura akati kwaari: “Iwewe uri mudzidzisi waIsuraeri, auzwisisi izvi here?, <sup>11</sup>Nge chokwadi ndinoti kouri, tinoreketa chetinozia, nesu tinopupura ngeicho chetakaona; nemwi amuashiri uchapupu hwedu. <sup>12</sup>Kuna ndamureketera zviro zvemunyika nemwi amuzi kuzvitenda, hino munozoitwa matenderenyi kudai ndechimubura ngezviro zvomudenga? <sup>13</sup>Akuna naumwe wakambokwira mudenga, asi uwo wakadzaka kubva mudenga, Mwana wakadzaka. <sup>14</sup>Kudai ndiMosi wakamurudza nyoka mushango, ngokudaro kunosisira kuti Mwana woMunhu amurudzwe, <sup>15</sup>kuti kunyazwi ndiani unomutenda aone kupona kusikaperi.” <sup>16</sup>Ngokuti Mwari wakaida nyika kudai, wakayipa Mwana wake wakabarwa ari ega, kuti veshe vanomutenda vasafa asi vaone kupona kusikaperi. <sup>17</sup>Ngokuti Mwari aazi kutuma Mwana wake munyika kuti atonge nyika, asi kuti nyika iponeswe kubudikidza ndiye. <sup>18</sup>Uwo unotenda kaari aatongwi; asi uwo usikatendi watotongwa nazvino, ngokuti aazi kutenda zita rouwo wakabarwa ari ega Mwana waMwari. <sup>19</sup>Uku ndikwo kutongwa: kuti kujeka kakaguma munyika, nevanhu vakada chidima kakurutu kupinda kujeka, ngokuti mushando yavo yaiya yakashata. <sup>20</sup>Ngokuti weshe unoita zvakashata unozonda kujeka naye aaui mukujeka, ngokuti mushando yake inozooneka pamhene. <sup>21</sup>Asi uwo unoita zvinegwinyiso unouya mukujeka, kuti mushando yake inase kuoneka kuti yakaitwa munaMwari. <sup>22</sup>Ngesure kweizvi, Jesu nevadzidzi vake vakaenda munyika yeJudha; naye wakagaramo navo echibhabhatidza. <sup>23</sup>Najohani waibhabhatidza muAenoni paduze peSarimu, ngokuti yaiapo mvura yakawanda; vanhu vakauya vakabhabhatidzwa. <sup>24</sup>Ngokuti Johani waiya asati aiswa mutirongo. <sup>25</sup>Zvino kwakaapo kuphikisana pakati pevadzidzi vaJohani nomuJudha ngendaa yokucheneswa. <sup>26</sup>Navo vakauya kunaJohani, vakati kwaari: “Rabhi, uwo waiya newe seri kweJorodhani, uwo wowakaita chapupu ndiye, uyu uri pano, unobhabhatidza, navo veshe vanoenda kwaari.” <sup>27</sup>Johani wakapingura, akati: “Munhu aakoni kuashira chiro kunyazwi ngechiri kuti asikazi kuchipuwa kubva mudenga. <sup>28</sup>Imwimwi mwemene mwakaita chapupu ndini kuti ndakati, ‘Inini andiriyepi Kristu, asi ndakatumwa pamberi pake.’” <sup>29</sup>Uwo una nyamuroorwa ngewe muroora; asi shamwari yomuroora, iyo inoema yechimuzwa, inodakara ngendaa yeizwi renyamuroora; ndizvo uku kudakara kwangu kwazadkisika. <sup>30</sup>Zvishafanira kuti iye akuriswe, asi inini ndinofanira kuti nditsonge.” <sup>31</sup>Uwo unouya echibva mudenga uri padera pazvo zveshe; uwo unobva munyika ngowenyika, naye unoereketa zvomunyika. Uwo unobva mudenga uri padera pazvo zveshe. <sup>32</sup>Naye unopupura ngezvo zvaakaona nezvaakazwa, asi akuna munhu unoashira chapupu chake. <sup>33</sup>Uwo unotenda zvanobuya, wakagwinyisa kuti Mwari igwinyiso. <sup>34</sup>Ngokuti uwo waatuma Mwari unoereketa mazwi aMwari, ngokuti iye aapi kwaari Mweya ngechipimo. <sup>35</sup>Baba vanoda Mukororo, navo vakapa zviro zveshe munyara dzake. <sup>36</sup>Uwo unotenda Mwana waane kupona kusikaperi; nouwo usikatendi Mwana aazooni kupona, asi ushungu waMwari hunozogara padera pake.

<sup>1</sup>zvino apo ishe aziva kuti vaFarisi vaiya vazwa kuti Jesu waiita nokubhabhatidza vadzidzi vakawanda kupinda Johani. <sup>2</sup>(kunyazwi Jesu emene aazi kubhabhatidza, asi vadzidzi vake). <sup>3</sup>Wakabva Judhia, akaendazve Garire. <sup>4</sup>Waisisira kuti ahambe ngomuSamaria. <sup>5</sup>Ndizvo wakaguma muguta revaSamaria rinozwi Sikha, pasinde pomunda uwo waakapa Jakobe kune mwana wake Josefa. <sup>6</sup>Chinyuka chaJakobe chaiyapo, ndizvo Jesu aremba ngomuhambo wake, wakagara pashi pabhiri pechinyuka. Rooda kuita awa rechitanhatu. <sup>7</sup>Kwakagumapo dzimai reSamaria koochera mvura. Jesu wakati kweriri: “Ndipewo mvura ndimwe.” <sup>8</sup>Ngokuti vadzidzi vake vaiya vaenda muguta kootenga zvokurwa. <sup>9</sup>Ndizvo dzimai reSamaria rakati kaari: “Ngenjiranyi kuti iwewe, uri muJudha, ukumbire mvura yokumwa kwendiri inini, dzimai reSamaria?” (Ngokuti vaJudha avaiyani nevaSamaria.) <sup>10</sup>Jesu wakapingura, akati kweriri: “Kudai waizia iwewe chipo chaMwari, nokuti ndiani uwo unokumbira kwouri kuti, ‘Ndipewo mvura, ndimwe’, iwewe waizokumbira kwaari, naye waizokupa mvura yokupona.” <sup>11</sup>Dzimai rakati kwaari: “Mambo, auna chidziyo chokuchera ndicho, nechinyuka chakadzama. Ndizvo mvura yokupona unoiona pari?” <sup>12</sup>Uri mukuru here iwewe kupinda baba edu Jakobe, uwo wakatipa ichi chinyuka, naye wakamwa kwechiri emene, nevana vake nezvifuyo zvake?” <sup>13</sup>Jesu wakapingura akati kweriri, “Kunyazwi ndiani unomwa kuneiyi mvura unozozwazve nyota,” <sup>14</sup>asi kunyazwi ndiani unomwa mvura yendinozomupa inini, aachazozwizve nyota mhera nariini. Mvura iyo yendinozomupa inozoitika chinyuka chemvura mukati make, chechivherukira kupona kusikaperi. <sup>15</sup>Dzimai rakati kwaari: “Mambo, ndipe mvurayo, kuti ndisachazozwa nyota nokuti ndisachazouya panozve koochera mvura.” <sup>16</sup>Jesu Wakati kweriri: “Enda, woodaidza mwamuna wako, muuye pano.” <sup>17</sup>Dzimai rakapingura rikati kaari: “Andina mwamuna.” Jesu wakati kweriri: “Wanasa kupingura zvakanaka zvevati: ‘Andina mwamuna,’ <sup>18</sup>ngokuti waimboiya nevamuna vashanu, nouwo woutori naye aasiri mwamuna wakopi! ngeizvi waereketa gwinyiso.” <sup>19</sup>Dzimai rakati kwaari, “Mambo, ndinoona kuti imwimwi muri muprofeti. <sup>20</sup>Madzibaba edu akadira kuneiri dunhu; nemwi munoti muJerusarema ndiyo ndau inosisira kudiriramwo.” <sup>21</sup>Jesu wakati kweriri: “Dzimai, nditende, nguva ichauya apo pemusikachazodiriri Baba kuneiri dunhu kunyazwi muJerusarema. <sup>22</sup>Imwimwi munotenda chomusikazii; isusu tinotenda chetinozia, ngokuti ruponeso runobva kuvaJudha. <sup>23</sup>Asi awa rinouya, nazvino raapano, apo vadiri vegwinyiso vanozodira Baba muMweya nomugwinyiso, ngokuti Baba vanotsvaka vakadaro kumudira. <sup>24</sup>Mwari ndiMweya, naavo vanomudira vanosisira kuti vamudire muMweya nomugwinyiso.” <sup>25</sup>Dzimai rakati kwaari: “Ndinozia kuti Mesia unouya: (uwo unozwi Kristu). ‘Naapo oouya, unozotironzera zviro zveshe.’” <sup>26</sup>Jesu wakati kweriri: “Inini unoereketa newe ndini ndemene.” <sup>27</sup>Panguvayo vadzidzi vake vakauya. Vakashamiswa ngokuti waieriketa nedzimai, asi apana naumwe wakati kwaari: “Unotsvakenyi?” nokuti, “Unoereketa naro ngenyi?” <sup>28</sup>Dizvo dzimai rakasiya nhuvu yaro yemvura, rakahwirira kuguta, rikati kuvanhu. <sup>29</sup>“Uyai, muone munhu uwo wandironzera zveshe zvendakaita. Uyu ungaita Kristu here?” <sup>30</sup>Vakabuda kubva muguta vechiuya kwaari. <sup>31</sup>Panguva iyo vadzidzi vake vakamukumbira vechiti: “Rabhi, irwai.” <sup>32</sup>Asi wakati kwavari: “Inini ndinakwo kurwa kwomusikazii imwimwi.” <sup>33</sup>Ndizvo vadzidzi vakati umwe kunoumweni: “Uripo here munhu wamuunzira chokudya?” <sup>34</sup>Jesu wakati kwavari: “Kurwa kwangu ndikwo kuita kuda kwouwo wakandituma nokupedza mushando wake. <sup>35</sup>Amubui here kuti: ‘Kwasara mwedzi mirongomuna, naapo kukukura kwaguma?’ Ndinomuronzera, mirudzai madziso enyu, muringire muminda, ngokuti yachena zvino yoda kukukurwa. <sup>36</sup>Uwo unokukura unoashira misharo, naye unounganidza michero yokupona kusikaperi, ndizvo uwo unosima naye unokukura vadakare veshe pamwepo. <sup>37</sup>Ngokudaro chisana ichi chineshokwadi chinoti: “‘Umwe unokusha noumweni unokukura.’” <sup>38</sup>Ndakamutuma kuti mukukure izvo zvomusikazi kushanda; vamweni vakashanda yaamho, nemwi mwapotera mumushando wavo. <sup>39</sup>Vanhu vajinji vemuguta revaSamaria vakamutenda ngendaa yeizwi redzimai, rerakapupura rechiti: “Wandironzera zveshe zvendakaita.” <sup>40</sup>Ndizvo apo vaSamaria vaguma kaari, vakamunyengerera kuti agare navo; naye wakagarapo mazuva mairi. <sup>41</sup>Nevajinji vamweni vakamutenda ngendaa yeizwi rake. <sup>42</sup>Navo vakati kunedzimai: “Zvino tinotenda, haiwa ngendaa yemazwi ako, asi ngokuti tadzizwira temene, nesu tinozia kuti uyu ngegwinyiso ndiye Muponesi wenyika.” <sup>43</sup>Ngesure kwemazuva mairi wakabvapo, akaenda muGarire. <sup>44</sup>(Ngokuti Jesu emene wakapupura kuti muprofeti aaremekedzwi munyika yake.) <sup>45</sup>Ndizvo apo aguma muGarire, vaGarire vakamuashira, ngokuti veshe vaiya vakaona zveshe zvaakaita muJerusarema padhiri, ngokuti navowo vakaenda kudhiri. <sup>46</sup>Ndizvo Jesu wakauyazve muKhana reGarire, apo paakapindudza mvura kuita waini. Kwaiyapo nduna yaiya nomwana wayo wairwara muKhapernaume. <sup>47</sup>Naapo nduna iyi yazwa kuti Jesu waiya abva Judhia aguma muGarire, yakaenda kwaari, yakamunyengerera kuti adzake aponese mwana wayo, ngokuti waiya ooda kufa. <sup>48</sup>Ndizvo Jesu wakati kweiri: “Kuti musikaoni mioniso nemishamiso amuzotendi. <sup>49</sup>Nduna yakati kwaari: ‘Mambo, dzaka mwana wangu asati afa.’” <sup>50</sup>Jesu wakati keiri: “Enda; mukororo wako unozopona.” Munhuwo wakagonda izwi rakaereketwa kwaari ndiJesu naye wakaenda. <sup>51</sup>Naapo achadzaka, varanda vake vakasangana naye, vakamurobura kuti mwana wake waponi. <sup>52</sup>Ndizvo wakabvunza awa iro raakatanga kuitanane ndiro, navo vakati kwaari: “Zuro ngeawa rechinomwe mutsarara wakamusiya.” <sup>53</sup>Ndizvo baba akazia kuti ndiro awa raakaereketa Jesu kwaari kuti: “Mukororo wako unozopona.” Naye pachake wakatenda nevemhatso yake yeshe. <sup>54</sup>Uyu ndiwo muoniso wechipiri waakaita Jesu, abva Judhia apo aguma Garire.

<sup>1</sup>Sure kweizvi kwaiyapo dhiri revaJudha, naJesu wakakwira Jerusarema. <sup>2</sup>Zvino riripo muJerusarema gandwa ngepamuswi wemakwai, unodaizwa ngechiHebheru kuti Bhethisaidha, rinemaberere mashanu. <sup>3</sup>Mukati mwawo

mwaiata vazhinji vairwara, vaiya mapofu nezvirema, nevakaputa, vechigarira kuvhundurwa kwemvura. <sup>4</sup>Ngokuti ngomukuwo wakatikuti, ngirosi yaidzaka mugandwa nokuvhundura mvura. Ndizvo kunyazwi ndiani waitanga kupoteramwo apo mvura yavhundurwa waiponeswa kunyazwi waiya nenhenda yakaitawani. <sup>56</sup>Kwaiyapo munhu umwe waiya nenhenda yake makore makumi matatu namasere. 6 Naapo Jesu amuona akaata, wakazia kuti waiya aripo kwomukuwo wakareba, wakati kwaari: “Unoda kuponeswa here?” <sup>7</sup>Munhu wairwara wakapingura kwaari echiti: “Mambo, andina munhu wokundidzasa mugandwa apo mvura yoovhundurwa. Asi mukuenda kwangu, umweni unodzaka kunditangira.” <sup>8</sup>Jesu wakati kwaari: “Miruka, utore manhi ako uhambe.” <sup>9</sup>Paripo munhuwo wakaponeswa, wakatora manhi ake akahamba. Ngezuva iro raiya Sabatha <sup>10</sup>Ndizvo vaJudha vakati kwaari uwo wakaponeswa: “Isabatha, autenderwi kuti utware manhi ako.” <sup>11</sup>Asi wakavapingura kuti: “Uwo wakaita kuti ndiponeswe ndiye wakati kwendiri: ‘Tora manhi ako, uhambe.’” <sup>12</sup>Wakamubvunza vechiti: “Ndiani munhu uwo wakati kwouri: ‘Tora manhi ako, uhambe?’” <sup>13</sup>Asi uwo wakaponeswa aazi kuzia kuti ndiani, ngokuti Jesu waiya angarangaka mumbungano huru yayiapo pandau iyo <sup>14</sup>Ngesure kweizvi, Jesu wakamuona ari muTemperi, naye wakati kwaari: “Ringira, wakaponeswa! Usachashashazve, kuti chiro chakapinda kushata kuneicho chisazokugumira.” <sup>15</sup>Munhu akaenda, akaronzera vaJudha kuti ndiJesu wakamuponesa. <sup>16</sup>Ngendaa iyi vaJudha waitambudza Jesu, ngokuti wakaita izvi ngeSabatha. <sup>17</sup>Asi Jesu wakavapingura echiti: “Baba angu vanondoshanda wanoshanda nazvino, neni ndinoshanda.” <sup>18</sup>Ndizvo ngendaa iyi vaJudha vakapindisisa kutsvaka kumuuraya, ngokuti iye aazi kugura Sabatha kwegu, asi wakaronzazve kuti Mwari waiya Baba ake vemene, echidziita pachake unoedzana naMwari. <sup>19</sup>Ndizvo Jesu wakapingura, akati kwavari: “Ngegwiniso ndinoti kwomuri, Mwana akoni kuita chiro ngokwake, asi icho chega chaanoona Baba vechiita; ngokuti kunyazwi ngechiri chaanoita Baba, Mwana unoitawo ngokudaro.” <sup>20</sup>Ngokuti Baba vanomuda Mwana, vanomupangidzira zveshe zvavanoita vemene; vanozomupangidzira mishando mikuru inopinda iyi, kuti mushamiswe. <sup>21</sup>Ngokuti kudai ndiBaba vanomusa avo vakafa nokuvapa kupona, ngokudaroze Mwana unopa kupona kuneavo vaanoda. <sup>22</sup>Ngokuti Baba avatongi munhu naumwe, asi vakapa kutonga kweshe kuno Mwana, <sup>23</sup>kuti veshe varemeredze Mwana, kudai ngezvevanoremeredza Baba. Uwo usikaremeredzi Mwana aremeredzi Baba uwo wakamutuma. <sup>24</sup>Ngegwiniso ndinoti kwomuri, uwo unozwa izwi rangu, atende uwo wakandituma, waanakwo kupona kusikaperi; aachapindi mukutongwa, asi wadarika kubva mukufa kupotera mukupona. <sup>25</sup>“Ngegwiniso ndinoti kwomuri, awa rinouya, nazvino raapano, apo vakafa vanozorizwa izwi roMukororo waMwari, naavo vanozorizwa vanozopona. <sup>26</sup>Ngokuti kudai ndiBaba unokupona mukati mwake, ndizvo wakapawo Mukororo kuti aanokupona mukati mwake, <sup>27</sup>naye wakamupa simba rokutonga ndaa, ngokuti iye Mukororo woMunhu. <sup>28</sup>Musashama ngeichi; ngokuti awa rinozouya apo veshe vari mumaiaba vanozorizwa izwi rake: <sup>29</sup>navo vanozobudamwo, avo vakaita zvakanaka mukumuka kwokupona, naavo vakaita zvakashata mukumuka kwokutongwa. <sup>30</sup>“Inini andikoni kuita chiro ngesimba rangu. Kudai ngezvevdinotonga, ndinotonga; nokutonga kwangu kwakarurama, ngokuti anditsviki kuta kwangu asi kuta kwouwo wakandituma. <sup>31</sup>Kudai inini ndechidzipupurira pachangu, chapupu changu achina gwinyiso. <sup>32</sup>Uripo umwe unoita chapupu ndini, neni ndinozia kuti chapupu chaanopupura ndini chinegwinyiso. <sup>33</sup>Iye waiya chibani chinobaka chinojekisa, nemwi mwakatenda kuti mudakare kwenguva doko mukujeka kwake. <sup>34</sup>Inini andiashiri chapupu chinobva kumunhu, asi ndinoronzwa izvi kuti imwimwi muponeswe. <sup>35</sup>Imwimwi mwakatuma kunaJohani, naye wakapupurira gwinyiso. <sup>36</sup>Asi inini ndinechapupu chinopinda kugwinya kunechaJohani; ngokuti mishando iyo yaakandipa Baba kuti ndiipedze, uyo muchando wendinoita, inopupura ndini kuti Baba vakandituma. <sup>37</sup>NaBaba uwo wakandituma wakaita chapupu pachake ndini. Amuzi kumbozwa izwi rake nakamwe nokuti kumboona muemo wake, <sup>38</sup>nemwi amuna izwi rake rinogara mukati mwenyu, ngokuti imwimwi amuzi kutenda uwo waakatuma. <sup>39</sup>Munotsvakisisa zvinyorwa, ngokuti imwimwi munopinikidza kuti mukati mwazvo munokupona kusikaperi; neizvo ndizvo zvinopupurua ndini. <sup>40</sup>Asi nemwi amutendi kuuya kwendiri kuti muone kupona. <sup>41</sup>Andiashiri kukudzwa kunobva kuvanhu. <sup>42</sup>Asi ndinomuzia kuti amuna rudo rwaMwari mukati mwenyu. <sup>43</sup>Inini ndakauya ngezina raBaba angu, nemwi amuzi kundiashira; kudai umweni echizouya ngezina rake remene, uwo munozomuashira. <sup>44</sup>Mungaita matenderenyi, imwimwi munoashira kuirikidzwa kubva kuno umwe nokuno umweni, musikatsviki kukudzwa ukwo kunobva kunaMwari ega? <sup>45</sup>Musapinimidza kuti inini ndinozomuitira ndaa kunaBaba; ndiMosi unomuitira ndaa, uwo wemwakagonda imwimwi. <sup>46</sup>Ngokuti dai mwakatenda Mosi, mwaizodai mwakatendawo inini, ngokuti wakanyora ngendaa yangu. <sup>47</sup>Asi kuti musikatendi zvakanorwa zvake, mungazoita matenderenyi mazwi angu?”

## 6

<sup>1</sup>Ngesure kweizvi Jesu wakaambuka ruseri rwoRuandhle rweGarire, urwo ndirwo Ruandhle rweThibheriasi. <sup>2</sup>Neungano huru yakamuteera, ngokuti yaiwa yaona zvishamiso zvaakaita kwavari vairwara. <sup>3</sup>Jesu wakakwira mudunhu, akagara pashi nevadzidzi vake. <sup>4</sup>Zvino Phasika, dhiri revaJudha, rakakwedzera. <sup>5</sup>Ndizvo Jesu amirudza madziso ake, aona kuti mbungano huru yayi yechiuya kwaari, wakati kunaFiripu, “Tinozotenga pari zvingwa kuti ava vadye?” <sup>6</sup>Asi wakareketa izvi kumuedza, ngokuti iye waiza chaanozoita. <sup>7</sup>Firipu wakamupingura echiti: “Zvingwa zvemazana mairi ezvigurwa zvesirivha azvivakwani kuti umwe ngaumwe atore kadoodoko.” <sup>8</sup>Umwe wevadzidzi vake, Andreu, munun'una waSimoni Petro, wakati kwaari: <sup>9</sup>“Uri pano murumbwana unezvingwa zvebhare zvishanu nezvihove zviiri; asi izvi zvingadeterenyi kuvanhu vazhinji vakadai?” <sup>10</sup>Jesu wakati: “Garisai vanhu pashi.” Kwaiyapo pandau iyo mwenje wakawanda; ndizvo vanhu vakagara pashi, vaida kuita makumi emazana mashanu kuwanda. <sup>11</sup>Ndizvo Jesu wakatora zvingwa, naapo abonga, wakakoanisa kunaavo vaiya vakagara pashi; wakaitazve kudaro nezvihove, veshe vakadya kudai ngezvevaikona. <sup>12</sup>Naapo vaguta wakati kuvadzidzi vake: “Unganidzai matsekeneswa asara, kuti kusarashwa

chiro.”<sup>13</sup> Ndizvo vakaunganidza, vakazadza zvitundu gumi nazviiri ngematsekeneswa ezvingwa zvebhare zvishanu akasara kuneavo vaiya vadya. <sup>14</sup> Ndizvo vanhu avo vaona uyu mushamiso waakaita, vakati, “Ngegwiniso uyu ndiye muprofeti uwo unouya munyika!” <sup>15</sup> Ndizvo apo Jesu echizia kuti vodo kuuya kuti vamutore ngesimba kuti vamuite mambo, wakavapozve akaenda kumutunhu ari ega. <sup>16</sup> Naapo zuva rabira, vadzidzi vake vakadzaka kuruandhle. <sup>17</sup> Vakawira mungarava, vakatanga kuambuka ruandhle kuenda Khapernaume. Kwaiya kwasvipa, naJesu waiya asati aguma kwavari. <sup>18</sup> Nema fungu oruandhle akakwira ngendaa yedutu guru raivhuvhuta. <sup>19</sup> Naapo vaiya vahamba paida kuita makhiromitha mashanu nokuti matanhatu, vakaona Jesu echihamba padera peruandhle, echikwedzera kungarava, navo vakatyiiswa. <sup>20</sup> Asi wakati kwavari: “Ndini hangu; musatya.” <sup>21</sup> Naapo vakadakara kumutora mungarava, paripo ngarava yakaguma kunyika kwavaienda. <sup>22</sup> Nechimangwani mbungano iyo yaiya yakasara ruseri rworuandhle yakaona kuti paiya pasina ngarava imweni, yega imwe iyo yevaiya vapotera kweiri vadzidzi vake, nokuti Jesu aazi kukwira pamwepo nevadzidzi vake mungarava, asi kuti vadzidzi vake vaiya vaenda vari vega. <sup>23</sup> Kwakauya ngarava dzimweni dzakabva Thibheriasi dzikaguma pasinde pendau apo pavakadya zvingwa ngesure Mambo azvibonga. <sup>24</sup> Ndizvo apo mbungano yaona kuti Jesu paiya pasina apapo nokuti vadzidzi vake, yakakwirawo mungarava yakauya muKhapernaume yechitsvaka Jesu. <sup>25</sup> Naapo waiya wamuona ruseri rworuandhle, yakati kwaari: “Rabhi, waguma pano riini”... <sup>26</sup> Jesu wakaipingura, akati: “Ngegwiniso ndinoti kwomuri, amunditsvaki ngokuti mwakaona mishamiso, asi ngokuti mwakadya zvingwa mukaguta. <sup>27</sup> Musashandira kudya ukwo kunopera, asi kudya ukwo kunogara kugumira narinhi, kwaanozomupa Mwana woMunhu; ngokuti padera pake Baba Mwari wakaisa chioniso chake. <sup>28</sup> Ndizvo vakati kwaari: “Tingaitei kuti tishande mishando yaMwari?” <sup>29</sup> Jesu wakapingura, akati kwavari: “Uyu ndiwo mushando waMwari kuti mutende uwo waakatuma.” <sup>30</sup> Ndizvo vakati kwaari: “Twewe unoita muoniso wenyi kuti tione, titende kwouri? Unoshandei?” <sup>31</sup> Madzibaba edu akadya mana mushango; kudai ngezvezvakanyorwa: ‘Wakavapa chingwa chakabva mudenga kuti vadye.’ <sup>32</sup> Naapo Jesu wakati kwavari: “Ngegwiniso ndinoti kwomuri, andiyepi Mosi wakamupa chingwa chakabva mudenga, asi Baba angu ndivo vanomupa chingwa chegwinyiso chinobva mudenga.” <sup>33</sup> Ngokuti chingwa chaMwari chiri uwo wakadzaka kubva mudenga nokupa kupona kunyika.” <sup>34</sup> Ndizvo vakati kwaari: “Mambo, tipei ichi chingwa nguva dzeshe. <sup>35</sup> Jesu wakati kwavari: “Inini ndiri chingwa chokupona; iye unouya kwendiri aatongozwi nzara, nouwo unotenda kwendiri aatongozwi nyota. <sup>36</sup> Asi ndakati kwomuri mwakandiona asi amuzi kunditenda. <sup>37</sup> Zveshe zvaanondipa Baba zvinozouya kwendiri; nouwo unouya kwendiri andizomurashi akadi. <sup>38</sup> Ngokuti andizi kudza kubva mudenga kuti ndiite kuda kwangu, asi kuda kwouwowakandituma; <sup>39</sup> uku ndikwo kuda kwowakandituma, kuti andisisiri kurashikirwa nachimwe chazvo zveshe zvaakandipa, asi kuti ndichimuse ngezuva rokupera.” <sup>40</sup> Ngokuti uku ndikwo kuda kwaBaba angu, kuti munhu weshe unoringira Mwana nokutenda kwaari unowanokupona kusikaperi; neni ndinozomumusa ngezuva rokupera.” <sup>41</sup> Ndizvo vaJudha vakavhuruvhuta ndiye, ngokuti wakati: “Inini ndiri chingwa chakadzaka kubva mudenga”. <sup>42</sup> Vakati: “Uyu andiyepi here Jesu, mwana waJosefa, baba namai ake vetinozia? Zvino unoita maereketere kuti: ‘Ndakadzaka kubva mudenga?’” <sup>43</sup> Jesu wakapingura akati kwavari: “Musavhuruvhuta pakati penyu. <sup>44</sup> Akuna naumwe unokona kuuya kwendiri, kudai Baba wakandituma asamukweya; neni ndinozomumusa ngezuva rokupera. <sup>45</sup> Kwakanyorwa muvaprofeti kuti: ‘Veshe vanozodidziswa ndiMwari.’ Ndizvo munhu weshe wakazwa, akadzidza kubva kunaBaba, unouya kwendiri. <sup>46</sup> Andirobui kuti uripo wakaona Baba, kwega iye wakabva kunaMwari; ndiye wakamuona Baba. <sup>47</sup> Ngechokwadi ndinoti kwomuri, iye unotenda waanokupona kusikaperi. <sup>48</sup> Inini ndiri chingwa chokupona. <sup>49</sup> Madzibaba enyu vakadya mana mushango, navo vakafa. <sup>50</sup> Ichi ndicho chingwa chinodzaka kubva mudenga, kuti kunyazwi ndiani kwomuri unochidya, aachafi. <sup>51</sup> Inini ndiri chingwa chokupona chakadzaka kubva mudenga; kuti kunyazwi ndiani unorwa ichi chingwa unozopona kusikaperi; nechingwa chendinozomupa chiri nyama yangu, yendinozopa kuita kupona kwenyika.” <sup>52</sup> Ndizvo vaJudha vakaitirana hasha pakati pavo vechiti: “Munhu uyu ungaita mapireyi nyama yake katiri kuti tirwe?” <sup>53</sup> Ndizvo Jesu wakati kwavari, “Ngechokwadi ndinoti kwomuri, kuti musikarwi nyama yemwana woMunhu, musikamwi ngazi yake, amuna kupona mukati mwenyu.” <sup>54</sup> Uwo unorwa nyama yangu nounomwa ngazi yangu waanokupona kusikaperi, neni ndinozomumusa ngezuva rokupera. <sup>55</sup> Ngokuti nyama yangu kurwa yaamho nengazi yangu kumwa yaamho. <sup>56</sup> Uwo unorwa nyama yangu nounomwa ngazi yangu, unogara mukati mwangu neni ndinogara mukati mwake. <sup>57</sup> Kudai ndiBaba vanopona vakandituma, neni ndinopona ndiBaba, ngokudaro uwo unondirwa, ndiye unozopona ndini. <sup>58</sup> Ichi ndicho chingwa chakadzaka kubva mudenga, chisikazi kudai ngechakarwa madzibaba vakafa. Uwo unodya chingwa ichi unozopona mhera nariini. <sup>59</sup> Wakareketa izvi echidzidzisa mumhatso yokudira muKhapernaume. <sup>60</sup> Ndizvo vazhinji vevadzidzi vake, apo vazwa, vakati, “Iri izwi rakakonzwa, ndiani unokona kurizwa?” <sup>61</sup> Asi Jesu, echizia mukati mwake kuti vadzidzi vake vakavhuruvhuta ngeizwi iro, wakati kwavari: “Ichi chinomudanisa here?” <sup>62</sup> Mungaiteyi kudai mwechiona Mwana woMunhu echikwira apo paaiya pakutanga? <sup>63</sup> NdiMweya unopa kupona, nyama ainyuri chiro. Mazwi endakareketa inini kwomuri ari mweya nokupona. <sup>64</sup> Asi varipo vamweni pakati penyu vasikatendi.” Ngokuti kubvira pakutanga, Jesu waindozia kuti ndiani avo vasikatendi nokuti ndiani unozomupira. <sup>65</sup> Naye wakati: “Ngeiyi ndaa ndakareketa kwomuri ndechiti, apana unokona kuuya kwendiri kuti asikazi kutenderwa ndiBaba.” <sup>66</sup> Ngesure kweizvi vazhinji vevadzidzi vake vakahwirira sure, avazi kuchazohamba naye, <sup>67</sup> Ndizvo Jesu wakati kunegumi navairi: “Imwimwi munoda kuendawo here?” <sup>68</sup> Simoni Petro wakamupingura akati: “Mambo, tingaenda kunani? Ndimwi munemazwi okupona kusikaperi; <sup>69</sup> nesu takatenda, tikazia kuti iwewe uri Wakachena waMwari.” <sup>70</sup> Jesu wakavapingura, akati: “Inini andizi kumutsanangura here murigumi navairi, noumwe wenyu uri dhiabhorosi?” <sup>71</sup> Wakaareketa ndiJudhasi, mwana waSimoni Isikarioti, ngokuti Judhasi ndiye waizomupira, ari umwe wegumi navairi.

<sup>1</sup>Ngesure kweizvi Jesu waihamba muarire; ngokuti waiya asikachadi kuhamba muJudhia, ngokuti vaJudha vaitsvaka kumuuraya. <sup>2</sup>Zvino dhiri revaJudha rematumba raiya pasinde. <sup>3</sup>Ndizvo vanun'una vake vakati kwaari: "Ibva pano uende Judhia, kuti vadzidzi vako vaone mishando younoita. <sup>4</sup>Ngokuti akuna munhu unoshanda ngokufishika echitsvaka kuti aziikanwe pamhene. Kudai wechiita izvi zviro, dzipangidzire kunyika." <sup>5</sup>Ngokuti vanunguna vake vaiya vasati vatenda kwaari. <sup>6</sup>Ndizvo Jesu wakati kwavari: "Nguva yangu aisati yaguma, asi nguva yenyu yakanaka mukuwo weshe. <sup>7</sup>Nyika aikoni kumuzonda imwimwi, asi inondizonda inini ngokuti ndinopupura ndiyo kuti mishando yayo yakashata. <sup>8</sup>Imwimwi endai kudhiri. Inini andiendiyo zvino kudhiri iri, ngokuti nguva yangu aisati yaguma." <sup>9</sup>Naapo areketa izvi, wakagara muGarire. <sup>10</sup>Asi apo vanunguna vake vaiya vaenda kudhiri, wakaendawo, haiwa pamhene, asi ngokufishika. <sup>11</sup>Ndizvo vaJudha vaimutsvaka padhiri vaiti: "Umboripari?" <sup>12</sup>Kwakaapo kugununa kukurutu pakati pevanhu ngendaa yake. Vamweni vakati: "Munhu wakanaka," vamweni vakati: "Haiwa, asi unopaukisa mbungano." <sup>13</sup>Asi ngendaa yokutya vaJudha apana naumwe wakaereketa ndiye pamhene. <sup>14</sup>Asi apo dhiri raapakati Jesu wakakwira muTemperi, akatanga kudzidzisa. <sup>15</sup>Ndizvo vaJudha vakashamiswa vechiti: "Uyu unaita maziirei zvinyorwa, asikazi kudzidza?" <sup>16</sup>Ndizvo Jesu wakavapingura, akati: "Kudzidzisa kwangu angokwangupi, asi ngokwouwo wakandituma. <sup>17</sup>Ndizvo Jesu wakavapingura, akati, "Kudzidzisa kwangu angokwangupi, asi ngokwouwo wakandituma; kunyazwi ndiani unoda kuita kuda kwaMwari, unozozia kuti chidzidziso chinobva kunaMwari here nokuti ndinodziereketera pachangu. <sup>18</sup>Mosi aazi kumupa Mipango here? Asi apana pakati penyu unongwarira Mipango. Munotsvakirenyi kundiuraya?" <sup>19</sup>ungano yakapingura ikati: "Unedhimoni! Ndiani unotsvaka kukuuraya?" <sup>20</sup>Jesu wakapingura, akati kwavari: "Ndakaita mushando umwe nemwi mweshe mwakashamiswa. <sup>21</sup>Ngeiyi ndaa Mosi wakamupanga kuti muchekwe esi akuzi kubva kunaMosi akadi, asi kwakabva kumadzibaba, nemwi ngezuva reSabbatha munocheka munhu. <sup>22</sup>Kudai munhu echiasira kuchekwa ngezuva reSabbatha, kuti Mupango waMosi usagurwa, hino munonditsenekera ngenyi ngokuti ndakaponesa munhu ngeSabbatha?" <sup>23</sup>Musatonga ngokuoneka kwokubanze, asi tongai ngokutonga kwakarurama. <sup>24</sup>Ndizvo vamweni vevanhu veJerusalem vakati, "Uyu andiyepi here munhu wevanotsvaka kuuraya?" <sup>25</sup>Ringirai, unoreketa pamhene navo avareketi chiro kwaari! Vatongi avazii here ngegwiniso kuti uyu ndiye Kristu?" <sup>26</sup>Asi tinozia paanobva munhu uyu. Naapo Kristu paanozoneka, apana naumwe unozia kuti unobva pari." <sup>27</sup>Ndizvo Jesu wakadaidzira, ari muTemperi echidzidzisa, akati: "Munondizia, munoziazve pendinobva. Andizi kuuya ngokwangu, asi uwo wakandituma uneshokwadi nemwi amumuzii. <sup>28</sup>Inini ndinomuzia, ngokuti ndinobva kwaari, naye wakandituma." <sup>29</sup>Ndizvo vakatsvaka kumubata; asi apana naumwe wakaisa nyara padera pake, ngokuti awa rake raiya risati raguma. <sup>30</sup>Asi vazhinji veungano vakatenda kwaari; vakati: "Naapo Kristu ouya unozokona here kuita mishamiso inopinda iyi yakaitwa ngouyu munhu?" <sup>31</sup>VaFarisi vakazwa ungano yechiita vherevhere ndiye; vapristi vakuru nevaFarisi vakatuma varindi veTemperi kuti vamubate. <sup>32</sup>Ndizvo Jesu wakati: "Ndichiri nemwi munguwa mudoko, neni ndinozoenda kuneuwo wakandituma. <sup>33</sup>Munozonditsvaka, asi amuzondioni; nependiri inini, amungakoni kugumapo." <sup>34</sup>Ndizvo vaJudha vakati pakati pavo: "Unozoenda kuri munhu uyu kwetisikazomuoni isu? Unozoenda here kunevakapararira pakati pevaGiriki nokudzidzisa vaGiriki?" <sup>35</sup>Rinotishinyi izwi iri raakareketa kuti: "Munozonditsvaka, asi amuzondioni, zve, 'Pendiri amungakoni kugumapo?' <sup>36</sup>Ngezuva rokupedzisira redhiri, zuva guru, Jesu wakamiruka, akadaidzira echiti: "Kunyazwi ndiani unenyota ngaauye kwendiri, amwe. <sup>37</sup>Uwo unotenda kwendiri, kudai ngokuronza kwezvinyorwa, 'Ndwi dzemvura yokupona dzinozopopoma kubva mwaari.' <sup>38</sup>Asi wakaereketa izvi ngendaa yoMweya wavanozoashira avo vanotenda kwaari; ngokuti Mweya waiya usati wapuwu, ngokuti Jesu waiya asati airikidzwa. <sup>39</sup>Naapo vazwa mazwi aya, vamweni vembungano vakati, "Uyu Muprofeti emene." <sup>40</sup>Vamweni vakati, "Uyu ndiKristu." Asi vamweni vakati, "Kristu ungabva Garire here?" <sup>41</sup>Zvinyorwa avizi kuronza here kuti Kristu unozobva kudzinza raDhavhidha nokubva Bhetherema, muguta mwaagira Dhavhidha?" <sup>42</sup>Ndizvo kwaiyapo kuparadzana pakati pembungano ngendaa yake. <sup>43</sup>Vamweni vavo vakada kumubata, asi apana naumwe wakaisa nyara padera pake. <sup>44</sup>Ndizvo varindi vakapetuka kuvapristi vakuru nokuvaFarisi, avo vakati kwavari: "Mwarekera kuuya naye ngenyi?" <sup>45</sup>Nevarindi vakapingura, vakati: "Akuna munhu wakamboereketa kudai ngouyu munhu." <sup>46</sup>Ndizvo vaFarisi vakavapingura vechiti: "Nemwiwo mwachengedzerwa here?" <sup>47</sup>Uripo here wevatongi nokuti wevaFarisi wakamutenda?" <sup>48</sup>Asi iyi mbungano isikazii Mipango yakatukwa." <sup>49</sup>Nikodhemusi, uwo wakaguma kwaari pakutanga, uwo waiya umwe wavo, wakati kwavari: "Mipango yedu inotonga here munhu isati yamuzwa nokuzia chaanoita?" <sup>50</sup>Vakapingura, vakati kwaari: "Newe unobva Garire here? Tsvakisisa uone, ngokuti akuna muprofeti unozobuda kubva Garire." <sup>51</sup>Munhu weshe wakaenda kumhatso yake.

<sup>1</sup>Asi Jesu wakaenda kuMutunhu wemaOrivhi. <sup>2</sup>Mangwanani maishi wakauryazve muTemperi; vanhu veshe vakauya kwaari, naye wakagara pashi, akavadzidzisa. <sup>3</sup>Vanyori nevaFarisi vakaunza kwaari dzimai rakabatwa rechiomba; naapo vaiya vaita kuti rieme pakati pavo, vakati kunaJesu, "Mudzidzisi, iri dzimai rabatwa rechiomba yaamho. <sup>4</sup>Zvino Mosi wakatipanga muMipango kuti madzimai akadaro apondwe ngamapuwe. Ndizvo iwewe unotinyi?" <sup>5</sup>Vakaereketa izvi vechimuedza, kuti vaone chokumuparisa ndaa ndicho. Asi Jesu wakakotama pashi, akanyora ngechinwe pamavhu. <sup>6</sup>Naapo vaangira kumubvunzisa, wakatwasuka, akati kwavari: "Iye usina kushaisha pakati penyu, ngaatange kukandira buwe kumuponda." <sup>7</sup>Wakakotamazve pashi, akanyora pamavhu ngeshikunwe. <sup>8</sup>Naapo vazvizwa, wakaenda umwe ngaumwe, kutanga ngevakurutu, metsa Jesu asara ari ega nedzimai rakaema pamberi pake. <sup>9</sup>Naapo Jesu wakatwasuka



akati kweriri: “Dzimai, vari pari avo vakakuitira ndaa? Apana here wasara echikuitira ndaa?”<sup>11</sup> Rakati: “Haiwa, apana naumwe, Mambowoe.” Jesu wakati kweriri: “Neni andikuitira ndaa; enda usachazoshaishazve.”<sup>12</sup> Ndizvo Jesu wakareketazve kwavari echiti: “Inini ndiri kujeka kwenyika; uwo unonditeera aazohambi muchidima, asi unozoa nokujeka kwokupona.”<sup>13</sup> Ndizvo vaFarisi vakati kwari: “Unodzipupurira; chapupu chako achina gwinyiso.”<sup>14</sup> Jesu wakapingura, akati kwavari: “Kunyazwi ndechidzipupurira pachangu, chapupu changu chinegwinyiso, ngokuti ndinozia pendakabva nependinoenda, asi imwimwi amuzii pendakabva nependinoenda.”<sup>15</sup> Imwimwi munotonga ngokwenyama, inini anditongi naumwe.<sup>16</sup> Asi kunyazwi ndechinyatonga, kutonga kwangu kunegwinyiso, ngokuti andinipi ndega ndinotonga, asi inini naBaba vakandituma.<sup>17</sup> Kwakanyorwa muMipango yenyu kuti chapupu chavanhu vairi ngeshonzwadi.”<sup>18</sup> Inini ndini ndinodzipupurira pachangu, naBaba avo vakandituma vanopupura ndini.”<sup>19</sup> Ndizvo vakati kwaari: “Vari pari Baba ako?” Jesu wakapingura, akati: “Imwimwi amundizii nokuti Baba angu; dai mwaindizia, mwaizoziazve Baba angu.”<sup>20</sup> Jesu wakareketa aya mazwi ari pasinde pebhokisi rinopirwa zvipo, echidzidzisa ari muTemperi; asi apana wakamubata, ngokuti awa rake rainga risati raguma.<sup>21</sup> Ndizvo wakatzizve kwavari: “Inini ndinoenda, nemwi munozonditsvaka, nemwi munozofira muzvishaishi zvenyu. Pendinoenda, amukoni kuuyapo.”<sup>22</sup> Ndizvo vaJudha vakati: “Unozdziuraya here, ngokuti unoti, ‘Pendinoenda, imwimwi amukoni kuyapo?’<sup>23</sup> Wakati kwavari: ‘Imwimwi muri vepashi, inini ndinobva mudenga; imwimwi muri venyika iyi, inini andisiri wenyika iyi akadi.”<sup>24</sup> Ndakamubaira kuti munozofira muzvishaishi zvenyu, ngokuti kudai musikatendi kuti ndini aye, munozofira muzvishaishi zvenyu.”<sup>25</sup> Ndizvo vakati kwari: “Uriani iwewe?” Jesu wakati kwavari: “Ndini uwo wendakamubaira pakutanga.”<sup>26</sup> Ndine zvakanwanda zvokureketa ndimwi nokutonga; asi uwo wakandituma uri gwinyiso, neni ndinoreketa kunyika izvo zvandakazwa kubva kwari.”<sup>27</sup> Avazi kuzwisisa kuti waiereketa kwavari ndiBaba.<sup>28</sup> Ndizvo Jesu wakati kwavari: “Naapo mwazomirudza Mwana woMunhu, naapo munozozia kuti inini ndini aye nokuti andiiti chiro ngesimba rangu remene, asi ndinoreketa kudai ngezvendakadzidziswa ndiBaba.”<sup>29</sup> Nouwo wakandituma undori neni; aazi kundisiya ndega, ngokuti ndinoita zvinomudakadza mukuwo weshe.”<sup>30</sup> Achareketa izvi, vazhinji vakatenda kwari.<sup>31</sup> Ndizvo Jesu wakati kuneavo vaJudha vakatenda kwaari: “Kudai mwechigara mumazwi angu, ngegwiniso muri vadzidzi vangu.”<sup>32</sup> Nemwi munozozia chokwadi negchokwadi rinozomusunhura.”<sup>33</sup> Vakamupingura vechiti: “Isusu tiri mibarirwana yaAbrahama, atizi kumboitwa varanda ngomunhu naumwe. Unodaro ngeni kuti: ‘Munozosunhurwa?’.”<sup>34</sup> Jesu wakavapingura echiti: “Ngechokwadi ndinoti kwomuri, kunyazwi ndiani unoita chishaishi, muranda wokushaisha.”<sup>35</sup> Muranda aagari mumhatso mhera nariini; mwana unogaramwo mhera narini.<sup>36</sup> Ndizvo kudai Mwana echizomusunhura, munozosunhurwa yaamho.”<sup>37</sup> Ndinozia kuti imwimwi muri mibarirwana yaAbrahama; asi munotsvaka kundiuraya, ngokuti izwi rangi arizi kuona ndau mukati mwenyu.”<sup>38</sup> Inini ndinoereketa izvo zvandakawanda kunaBaba angu, nemwiwo munoita zvemwakazwa kubva kunababa enyu.”<sup>39</sup> Vakamupingura, vakati kwaari: “Abrahama ndibaba edu.” Jesu wakati kwavari: “Kudai mwaiya vana vaAbrahama, mwaizoita mishando yaAbrahama.”<sup>40</sup> Asi zvino munotsvaka kundiuraya, munhu wamuronzera gwinyiso, iro rendakazwa kubva kunaMwari; Abrahama aazi kuita zvakadai.<sup>41</sup> Imwimwi munoita mishando yababa enyu.” Vakati kwaari: “Isusu atizi kubarwa ngokuomba; tinaBaba umwe, ndiMwari.”<sup>42</sup> Jesu wakati kwavari: “Kudai Mwari aiya Baba enyu, mwaizondida, ngokuti ndakabuda ndechibva kunaMwari; andizi kuuya ngokuda kwangu, asi iye wakandituma.”<sup>43</sup> Amuzwisisi ngei zvendinobuya? Ngokuti amukoni kuzwisisa izwi rangi.”<sup>44</sup> Imwimwi muri vababa enyu Dhiabhorosi, nokudisira kwenyu kuita kuba kwababa enyu. Uwo waiya muurayi kubvira pakutanga, naye aazi kuema mugwinyiso, ngokuti gwinyiso amuna mukati mwake. Naapo echinyepa, unoreketa kudai ngechibarirwe chake, ngokuti iye uri munyepi nababa emanyepo.”<sup>45</sup> Asi ngokuti inini ndinobuya chokwadi, amunditendi.”<sup>46</sup> Ndiani kwomuri ungandionisa ndaa yendakashaisha? Kudai ndechibuya chokwadi, amunditendi ngei?”<sup>47</sup> Uwo uri waMwari unozwa mazwi aMwari; ngeiyi ndaa imwimwi amundizwi, ngokuti amuri vaMwari akadi.”<sup>48</sup> VaJudha vakapingura, vakati kwaari: “Atinasi kurobuya here kuti uri muSamaria newe unedhimoni?”<sup>49</sup> Jesu wakapingura echiti: “Inini andina dhimoni; asi ndinoremereza Baba angu, nemwi amundiremekedzi.”<sup>50</sup> Asi inini anditsvaki kuiridzwa kwangu; uripo umwe unokutsvaka, naye unoita mutongi.”<sup>51</sup> Ngegwiniso ndinoti kwomuri, kunyazwi ndiani unongwarira izwi rangi, aatongozooni rufu.”<sup>52</sup> VaJudha vakati kwaari: “Zvino tinoziva kuti unedhimoni. Abrahama wakafa nevaprofeti ngokudaro; newe unoti, ‘Kunyazwi ndiani unongwarira izwi rangi, aatongozozwi rufu.’”<sup>53</sup> Iwewe uri mukuru here kupinda baba edu Abrahama, vakafa? Nevaprofeti vakafa. Unodziita anani?”<sup>54</sup> Jesu wakapingura echiti: “Kudai ndechidziremeredza pachangu, kudziremeredza kwangu akuna shwiro; ndiBaba angu vanondiremekedza, vomunoti ndivo Mwari wenyu.”<sup>55</sup> Asi amuzi kuvazia; inini ndinovazia. Kudai ndechiti, andivazii, ndaita munyepi kudai ndimwi. Asi ndinovazia neni ndinongwarira izwi ravo.”<sup>56</sup> Abrahama baba enyu vakadakara ngokuti vaizoriona zuva rangi, navo vakariona, vakadakara.”<sup>57</sup> VaJudha vakati kwaari, “Ausati waguma makore makumi mashanu, newe wakaona Abrahama here?”<sup>58</sup> Jesu wakati kwavari: “Ngegwiniso ndinoti kwomuri, Abrahama asati aapo, ndaiyapo.”<sup>59</sup> Ndizvo vakatora mapuwe kuti vamuponde; asi Jesu wakadzifisha pachake, akabuda kubva muTemperi.

## 9

<sup>1</sup>Naapo echipinda, wakaona munhu waiya bofu kubvira pakubarwa kwake. <sup>2</sup>Nevadzidzi vake vakamubvunza vechiti: “Rabhi, ndiani wakashaisha, uyu munhu nokuti vabari vake, kuti abarwe ari bofu?” <sup>3</sup>Jesu wakapingura akati: “Uyu munhu aazi kushaisha nokuti vabari vake, asi kuti mishando yaMwari ioniswe mwaari.” <sup>4</sup>Kunosisira kuti tishande mishando youwo wakandituma achimasikati; ngokuti usiku hunouya, naapo apana ungakona kushanda. <sup>5</sup>Naapo ndichindorimwo munyika, ndiri kujeka kwenyika.” <sup>6</sup>Naapo aereketa izvi, wakapfira mata pamavhu, wakakanya matope

ngemata, wakadzodza madziso aro ngedope. <sup>7</sup>Wakati kweriri: “Enda, ushambe muGandwa reSiroamu.” (Ngokukumuchwa kunoti Wakatumwa.) Ndizvo wakaenda, akashamba, wakauya oona. <sup>8</sup>Ndizvo vaakirwana vake naavo vaimuona kare, ari mupemhi, vakati: “Uyu andiyepi here munhu uwo waigara pashi echipemha?”. <sup>9</sup>Vamweni vakati: “Ndiye.” Vamweni vakati, “Haiwa, asi unotodzana naye.” Naye wakati: “Ndini.” <sup>10</sup>Ndizvo vakati kwaari: “Madziso ako akaita mapembenudzirwenyi?”. <sup>11</sup>Wakapingura, akati: “Munhu unozwi Jesu wakaita matope, akadzodza madziso angu, akati kwendi: ‘Enda Siroamu ushambe.’ Ndizvo ndakaenda ndikashamba, ndikaona.” <sup>12</sup>Navo vakati kwaari: “Uri pari munhuwo?” Wakati: “Andizii.” <sup>13</sup>Vakaunza kuvaFarisi munhu uwo waiya bofu. <sup>14</sup>Raiya zuva reSabatha apo Jesu paakaita matope akapembenudza madziso aro. <sup>15</sup>Ndizvo vaFarisi vakamubvunzazve kuti wakaita mapembenudzirwenyi. Naye wakati kwavari: “Wakaisa matope pamadziso angu; ndakashamba, neni ndinoona.” <sup>16</sup>Ndizvo vamweni vevaFarisi vakati: “Uyu munhu aabvi kunaMwari, ngokuti aangwariri Sabatha.” Asi vamweni vakati: “Munhu mushaishi ungaita maitirenyi iyi mioniso?” Kwakaapo kuparadzana pakati pavo. <sup>17</sup>Ndizvo vakatizve kunebofu: “Unotinyi ndiye iwewe, ngendaa yokuti wakapembenudza madziso ako?” Naye wakati: “Muprofeti.” <sup>18</sup>Ndizvo vaJudha avazi kutenda kuti ndiye waiya bofu nokuti wakapembenudza, metsa vakadaidza vabari vouwo wakapembenudza. <sup>19</sup>navo vakavabvunza vechiti, “Uyu mwana wenyu here, uwo womunoti, wakabarwa ari bofu? Ndizvo zvino unoita maonerei?”. <sup>20</sup>Ndizvo vabari vake vakapingura vakati: “Chetinozia ngechokuti uyu mwana wedu nokuti wakabarwa andori bofu. <sup>21</sup>Asi kuti unoita maonerenyi atizii, nokuti ndiani wakapembenudza madziso ake, atizii. Mubvunzenyi; wabva muzero, unozodiereketera pachake.” <sup>22</sup>Vabereki vake vakarbuya izvi ngokuti vaitya vaJudha, ngokuti vaJudha vaiya vakatenderana kuti kunyazwi ndiani unozomutenda kuti iye ndiKristu, unozodzingwa kubva mumhatso yokudira. <sup>23</sup>Ngeiyi ndaa vabari vake vakati: “Wabva muzero, mubvunzenyi.” <sup>24</sup>Ndizvo vakamudaidza ngekechepiri uwo waiya bofu, vakati kwari: “Irikidza Mwari iwewe, isusu tinozia kuti uyu munhu mushaishi.” <sup>25</sup>Ndizvo iye wakapingura, akati: “Kunyazwi mushaishi, andizii. Chiro chimwe chega chendinozia, ngechokuti inini ndaiya bofu, zvino ndinoona.” <sup>26</sup>Vakati kwaari: “Wakaitenyi kwouri? wakakuvula madjiso ako here?”. <sup>27</sup>Wakavapingura echiti: “Ndatomuronzera nemwi amuzi kupurutana. Ngenyi mwechida kuzwazve? Nemwiwo munoda kuita vadzidzi vake here?”. <sup>28</sup>Vakamutuka vechiti: “Iwewe uri mudzidzi wake, asi isusu tiri vadzidzi vaMosi.” <sup>29</sup>Tinozia kuti Mwari wakareketa kunaMosi, asi uyu munhu, atizii paanobva.” <sup>30</sup>Munhu wakapingura, akati kwavari: “Iri igumo! Kuti amuzii paanobva, asi wakapembenudza madziso angu. <sup>31</sup>Tinozia kuti Mwari atendii vashaishi. Asi kunyazwi ndiani unomuremeredza nokuuta kuda kwake, Mwari unomupurutana. <sup>32</sup>Kubvira pakutanga akuzi kumbozwa kuti munhu wakambopembenudza madziso owakabarwa ari bofu. <sup>33</sup>Kudai uyu munhu asikabvi kunaMwari, aangakoni kuita chiro.” <sup>34</sup>Vakamupingura vakati kwaari: “Iwewe wakabarirwa mukushaisha yaamho, newe wotidzidza here?” Vakamudzingira kubanze. <sup>35</sup>Jesu wakazwa kuti vona vakamugogomera musinagoge: ena wakamuwana akati “Iwewe unotenda Mukororo woMunhu here?”. <sup>36</sup>Naye wakapingura akati: “Ndiani, Mambo, kuti nditende kwaari?”. <sup>37</sup>Jesu wakati kwaari: “Wamuona, ndiyezve unoereketa newe.” <sup>38</sup>Wakati: “Mambo, ndinotenda.” Naye wakamudira. <sup>39</sup>Jesu wakati: “Inini ndakaviira kuzotonga munyika muno, kuti vasingaoni vaone nevanoona vaitwe mapofu.” <sup>40</sup>Vamweni vevaFarisi vainga varipo, vaizwa swiro iswi, vakati kwaari: “Nesuwu tiri mapofu here?”. <sup>41</sup>Jesu wakati kwavari: “Kudai mainga mapofu, maizodai musinga shaishi. Asi zvino munoti, ‘Tinoona,’ kushaisha kwenyu kunondogara kuripo.

## 10

<sup>1</sup>“Ngegwiniso ndinoti kwomuri, uwo usikapindi ngepamusuwo mudanga remakwai, asi echipinda ngeimweni njira, uwo imbava nedzongoni. <sup>2</sup>asi wia anonguena gomusuwo ndiena muyushi omakwai. <sup>3</sup>Naapo abudisa ake eshe, unoatungamirira, nemakwai anomuteera, ngokuti anozia izwi rake. <sup>4</sup>Kwaari murindi womusiwo unobeurira muushi, nemakwai anozwa izwi rake, unodaidza makwai ake ngemazina awo nokuatungamirira kubanze. <sup>5</sup>Jesu wakaereketa uyu muedzaniso kwavari, asi avazi kuzwisisa izvo zvaakaereketa kwavari. <sup>6</sup>Aazoteeri mupara, asi anozotiza kubva kwaari, ngokuti aazii izwi romupara.” <sup>7</sup>Veshe vakatanga pamberi pangu imbavha nemadzongoni; asi makwai aazi kuvapurutana. <sup>8</sup>Ndizvo Jesu wakaereketa kwavari echiti: “Ngegwiniso ndinoti kwomuri, inini ndiri musuwo wemakwai. <sup>9</sup>Mbavha inouya kwega kuba nokuuraya nokuparadza; inini ndakauya kuti vaone kupona, vakuone kakurutu. <sup>10</sup>Inini ndiri musuwo; kunyazwi ndiani unopinda ndini, unozoponeswa, unozopotera nokubuda, aone kudya. <sup>11</sup>Inini ndiri muushi wakanaka. Muushi wakanaka unoisira pashi kupona kwake ngepamusoro pemakwai. <sup>12</sup>Asi uwo unoshanda kuti aone muthuso, asiri muushi akadi, uwo makwai aasiri ake akadi, unoona thika rechiuya, unosiya makwai, unotiza; nethika rinoruma nokuaparadza. <sup>13</sup>Unotiza ngokuti unoshandira muthuso, aana ndaa nemakwai. <sup>14</sup>Inini ndiri muushi wakanaka, neni ndinoazia angu, naanguwo anondizia. <sup>15</sup>Kudai ngezvaanondizia Baba, neniwo ndinovazia Baba, neni ndinoisira kupona kwangu pashi ngendaa yemakwai. <sup>16</sup>Ndinawo amweni makwai, asiri eiri danga; nawozve ndinoisira kuti ndiaunze, nawo anozopurutana izwi rangu. Nawo anozoitanga danga rimwe nomuushi umwe. <sup>17</sup>Ngeiyi ndaa Baba vanondida, ngokuti ndinoisira pashi kupona kwangu, kuti ndikutorezve. <sup>18</sup>Apana munhu unokutora kubva kwendi, asi ndinokuisa pashi ngokuda kwangu. Ndine simba rokukuisa pashi, ndine simba rokukutorazve; uyu mupango ndakaupwa ndiBaba angu.” <sup>19</sup>Kwaiyapozve kuparadzana pakati pevajudha ngendaa yemazwi aya. <sup>20</sup>Vazhinji vavo vakati, “Une dhimoni, naye waakupenga. Ngenyi mwechimupurutana?” <sup>21</sup>Vamweni vakati, “Aya mazwi andiopi anoereketwa ngounomuka nedhimoni. Dhimoni ringapembenudza madziso ebofu here?”. <sup>22</sup>Waiya mukuwo wedhiri rokupira Temperi muJerusarema; paiya pachando. <sup>23</sup>naJesu wakahamba muTemperi, muBerere raSoromoni. <sup>24</sup>Ndizvo vaJudha vakamuunganira, vakati kwaari, “Unotiita gariremwo metsa riini? Kuti uri Kristu, tironzere pamhene.” <sup>25</sup>Jesu

wakavapingura echiti, “Ndakamuronzera, nemwi amutendi. Mishando yendinoita ngezina raBaba angu, inopupura ndini.”<sup>26</sup> Asi imwimwi amutendi ngokuti amusiri vemakwai angu.<sup>27</sup> Makwai angu anozwa izwi rangu, neni ndinoazia, nawo anonditeera.<sup>28</sup> Ndinoapa kupona kusikaperi, nawo aazofi nariini, zve akuna unoabvuka kubva munyara yangu.<sup>29</sup> Baba angu, uwo wakaapa kwendiri, mukuru kwavari veshe, apana naumwe unokona kuabvuka kubva munyara yaBaba.<sup>30</sup> Inini naBaba tiriumwe.”<sup>31</sup> VaJudha vakatonherazve mapuwe kuti vamuponde.,<sup>32</sup> Jesu wakavapingura echiti, “Ndakamuonisa mishando mizhinji yakanaka inobva kunaBaba. Ngouri kweiyo mishando womunondipondera ngemapuwe?”<sup>33</sup> VaJudha vakamupingura vechiti: “Atikupondi ngendaa yomushando wakanaka, asi ngendaa yokutuka Mwari; ngokuti iwewe, uri munhu, unodziita Mwari.”<sup>34</sup> Jesu wakavapingura echiti: “Akuzi kunyorwa here muMipango yenyu kuti: ‘Ndakati, muri zvimwari?’”,<sup>35</sup> Kudai akavadaidza kuti zvimwari, kwavari avo kwarakaguma izwi raMwari, (nezvinyorwa azvingadarikwi),<sup>36</sup> Munoreketa ngenyi ndiye, uwo waakaemesa Baba nokumutuma munyika kuti, ‘Unotuka Mwari,’ ngokuti ndakaronza kuti, ‘Inini ndiri Mukororo waMwari?’”,<sup>37</sup> Kudai ndisikaiti mishando yaBaba angu, musanditenda.<sup>38</sup> Asi kuti ndechiita, kunyazwi musikanditendi, tendai mishando, kuti muzie nokuzwisisa kuti Baba vari mukati mwangu neni ndiri mukati mwaBaba.”<sup>39</sup> Ndizvo vakatsvakazve kumubata, asi iye wapakonyoka kubva munyara dzavo.<sup>40</sup> Jesu wakaendazve ruseri rweJorodhani kundau iyo yaakabhabhatidzira ndi Johani pakutanga, wakagarapo.,<sup>41</sup> Vanhu vazhinji vakauya kwaari; navo vakati, “Johani pashokwadi aazi kuita shioniso, asi zvesse zvaakabuia Johani ngendava youyu munhu zvine gwinyiso.”<sup>42</sup> Wakawanda wakatenda kaari Jesu.

## 11

<sup>1</sup>painga pano mumwe murume waizwi Razarusi aiwadja. weBhethani, guta ra Maria na Nataita yake hama. <sup>2</sup>Ndiye uyu Maria wakadzodza Mambo ngemafuta, akapukuta tsoka dzake ngebvudzi rake, mukoma wake Razarusi wairwara. <sup>3</sup>Ndizvo hanzvadzi dzake dzakatumira kwaari dzechiti: “Mambo, penya, uwo wounoda unorwara.” <sup>4</sup>Asi apo Jesu azvizwa wakati: “Uku kurwara andikwopi kworufu; asi ngokwokukurisa Mwari, kuti Mwana waMwari akuriswe ndikwo.”<sup>5</sup> Zvino Jesu wakada Maritha nomunukuna wake na Razarusi. <sup>6</sup>swino apo azwa kuti lazaro wairwara, wakagara mazuva maviri pandau paaiwapo. <sup>7</sup>Ngesure kweizvi wakati kuvadzidzi vake: “Ngatihwirirezve Judhia.”<sup>8</sup> Vadzidzi vakati kwaari: “Rabhi, vajudha vaitotsvaka kukuponda ngemapuwe, tohwirireyozve here?” <sup>9</sup>Jesu wakapingura akati: “Amuna mahawa gumi namairi muzuva here? Kudai munhu echihamba masikati aapumhunwi, ngokuti unoona kujeka lomunyika muno here. <sup>10</sup>Asi kudai munhu echihamba usiku unopumhunwa, ngokuti kujeka amuna mukati mwake.” <sup>11</sup>Wakaereketa izvi, naapo wakati kwavari: “Razarusi shamwari yedu waata, asi inini ndinoenda koomumusa.”<sup>12</sup> Ndizvo vadzidzi vakati kwaari: “Mambo, kuti akaata, unozoitane.” <sup>13</sup>Zvino Jesu waiya aereketa ngorufu rwake, asi ivo vaikarakadza kuti waieriketa ngokuzorora mukuata. <sup>14</sup>Naapo Jesu wakanasa kuvaronzera pamhene kuti: “Razarusi wafa;”<sup>15</sup> Ndizvo Thomasi, uwo unozwi Munyambiri, wakati kuvadzidzi vangani vake: “Nesu ngatiendewo, kuti tife naye.” <sup>16</sup>Neni ndinodakara ngepamusoro penyu ngokuti ndaiya ndisiriyo, kuti mutende. Asi ngatiende kwari.” <sup>17</sup>Naapo Jesu aguma, wakaona kuti Razarusi waiya aanemazuva marongomuna muiba. <sup>18</sup>Bhethani raiya pasinde peJerusarema, pasikagumi makhiromitha matatu. <sup>19</sup>nevazhinji vevaJudha vaiya vaguma kunaMaritha naMaria, kuti vavaembedzere ngendaa yokufa kwomukoma wavo. <sup>20</sup>Naapo Maritha, azwa kuti Jesu uri kuuya, wakaenda kooshongana naye, asi Maria wakasara akagara mumhatso. <sup>21</sup>Ndizvo Maritha wakati kunaJesu: “Mambo, kudai waiya pano, mukoma wangu waidai asikazi kufa.” <sup>22</sup>Nazvino ndinozia kuti izvo zvounozokumbira kunaMwari, Mwari unozokupa.” <sup>23</sup>Jesu wakati kwaari: “Mukoma wako unozomukazve.” <sup>24</sup>Maritha wakati kwaari: “Ndinozia kuti unozomuka mukumuka kwezuva rokupera.” <sup>25</sup>Jesu wakati kwaari, “Inini ndiri kumuka nokupona; uwo unonditenda kunyazwi afa, unozoponazve,”<sup>26</sup> Nouwo unopona echinditenda, aatongozofi. Unotenda ichi here?” <sup>27</sup>Akati kwaari: “Eya, Mambo; inini ndinotenda kuti iwewe ndiwe Kristu, Mwana waMwari, uwo unouya munyika.” <sup>28</sup>Naapo aronza izvi, wakaenda, akadaidza Maria mununguna wake ngokufishika, akati: “Mudzidzisi waapano, unokudaidza.” <sup>29</sup>Naye azwa, wakakasira kumiruka, akaenda kwaari. <sup>30</sup>Naapo vajudha avo vaiya naye mumhatso vechimuembedzera, vaona kuti Maria wamiruka ngokukasira, akabuda kubanze, vakamuteera, vechikarakadza kuti unoenda kuiba koochemerapo. <sup>31</sup>Apo Maria aguma paiya naJesu, amuona wakawa pashi patsoka dzake, akati kwaari: “Mambo, kudai waiya pano, mukoma wangu waidai asikazi kufa.” <sup>32</sup>Zvino Jesu waiya asati aguma muguta, asi waiya achipo paakashongana naMaritha. <sup>33</sup>Naapo Jesu amuona echichema, nevaJudha vechichema, avo vakauya naye, wakaita mahwema mumweya mwake nokutambudzika; <sup>34</sup>Naye wakati: “Mwakamuradzika pari?” Vakati kwaari: “Mambo, uyai muone.” <sup>35</sup>Jesu wakachema. <sup>36</sup>Ndizvo vajudha wakati: “Wonai, kumudisisa kwake.” <sup>37</sup>Asi vamweni vavo wakati: “Uyu munhu, wakasvinura madziso owaiya bofu, waiya asikakoni here kuita kuti uyu munhu asafa?” <sup>38</sup>Naapo Jesu, echitambudzika kakurutu mukati mwake, wakaguma kuiba; raiya bako nebuwe raiya rakadumaidza padera paro. <sup>39</sup>Jesu wakati: “Dusai buwe.” Maritha, hanzvadzi youwo wakafa, wakati kwaari: “Mambo, zvino wotonuhwa, ngokuti waane mazuva marongomuna afa.” <sup>40</sup>Jesu wakati kwaari: “Andizi kukuronzera here kuti dai wechitenda ungazoonza uthende hwaMwari?” <sup>41</sup>Ndizvo vakadusa buwe. NaJesu wakaringira mudenga akati: “Baba, ndinomubonga ngokuti mwakandizwa. <sup>42</sup>Neni ndinozia kuti unondizwa ngenguva dzeshe. Asi ngepamusoro pembungano yakaema pasinde ndaronza kudaro, kuti itende kuti ndiwe wakandituma.”<sup>43</sup> Naapo aronza izvi, wakadaidzira ngeizwi guru echiti: “Razarusi, buda.” <sup>44</sup>Uwo waiya akafa wakabuda, akasungwa tsoka nenyara ngemachira okuikwa nawo, nehope yake yakasungwa ngejira doko. Jesu wakati kwavari: “Musunhurenyi, mumuziereke aende.”<sup>45</sup> Ndizvo vazhinji vevaJudha avo vakauya kunaMaria, vechiona izvo zvaakaita Jesu, wakatenda. <sup>46</sup>Asi vamweni vavo vakaenda kuvaFarisi, vakavaronzera zvaaiya aita Jesu. <sup>47</sup>Ndizvo vapristi vakuru nevaFarisi vakaungana pamwepo nevatongi kuita bangano, wakati: “Tinozoitenyi? Ngokuti uyu

munhu unoita mioniso yakawanda. <sup>48</sup>Kudai techimurekera echiangira kudaro, vanhu veshe vanozotenda kwaari, nevaRoma vanozouya vaparadze zveshe ndau yedu yakachena nedzinza redu.”<sup>49</sup> Asi umwe wavo, Kaiafasi, uwo waiya mupristi mukuru ngegorero, wakati kwavari: “Amuzii chiro nachimwe. <sup>50</sup>Amuzwisisi kuti zvirinane kwomuri kuti munhu umwe unosisira kufira vanhu vazhinji pane kuti dzinza reshe ripere.”<sup>51</sup> Aazi kuronza izvi ngokuda kwake, asi ngokuti waiya mupristi mukuru ngegorero, wakapofeta kuti Jesu unozofira dzinzaro. <sup>52</sup>Asi haiwa kufira dzinzaro kwega, asi kuti aunganidzewo pamwepo vana vaMwari avo vakapararira kunyika dzeshe, kuti vaite umwe. <sup>53</sup>Ndizvo kubvira ngezuva iro vakaita bangano pamwepo kuti vamuuraye. <sup>54</sup>Ndizvo Jesu aazi kuchahambazve pamhene pakati pevaJudha, asi kubva apo wakaenda kunyika iri pasinde norubaya, kudhorobha rinozwi Efuremu; naapo wakagara nevadzidzi vake. <sup>55</sup>Zvino Phasika revaJudha raiya pasinde, vazhinji vakakwira Jerusalem vechibva munyika, Phasika risati raguma, kuti vadzichenese. <sup>56</sup>Ngokudalo vona vakatsvaka Jesu, vakaema mu Temperi vechiti umwe kune umweni: “Munotinyi? Kuti aazouyi here kundhiri?”. <sup>57</sup>Ndizvo vapristi vakuru nevaFarisi vaiya vakaita mupango kuti kunyazwi ndiani unozia paari, ngaabuie, kuti vamubate.

## 12

<sup>1</sup>Ndizvo mazuva matanhatu Phasika risati raguma, Jesu akaguma Bhethani, apo paiya naRazarusi, uwo waakamusa kwavakafa. <sup>2</sup>Naapo vakamunasirira kudya kwemadeekoni; Maritha wakavaburira, naRazarusi waiya umwe weavo vaigara naye pakudya. <sup>3</sup>Naapo Maria wakatora mafuta anoda kukwana litha okuzora enarde aidhura naye wakadzodza tsoka dzaJesu, akapukuta tsoka dzake ngebvudzi rake; nemhatso yakazara ngegwema rakanaka remafuta. <sup>4</sup>Asi Judhasi Isikarioti, umwe wevadzidzi vake, (uwo waizomupira) wakati: <sup>5</sup>“Ngenyi asikazi kutengeswa mafuta aya ngemadhura mazana matatu, apuwe varombo?”. <sup>6</sup>Izvi wakazvironza, haiwa ngokuti waivada varombo, asi ngokuti waiya mbavha, waingwarira nyede naye waitora zvaiiswamwo. <sup>7</sup>Ndizvo Jesu wakati: “Murekerei ari ega. Ngaangwaririre zuva rokuikwa kwangu”. <sup>8</sup>Ngokuti varombo munavo nguva dzeshe, asi amunenipi nguva dzeshe.” <sup>9</sup>Naapo vazhinji veungano yevaJudha vakazia kuti waiyapo, vakauya, haiwa kuti vaone Jesu kwega, asi kuti vaonezve Razarusi, uwo waakamusa kubva kwavakafa. <sup>10</sup>Ndizvo vapristi vakuru vakapangana kuti vauraye naRazarusiwo, <sup>11</sup>ngokuti ngepamusoro pake vazhinji vevaJudha vaienda vechitenda kunaJesu. <sup>12</sup>Nechimangwani mbungano huru iyo yakauya kudhiri, yakazwa kuti Jesu unouya Jerusalem. <sup>13</sup>Yakatora matai emichindwi, yakabuda kooshongana naye, vakadaidzira vechiti: “Hosana! Unomuchena uwo unouya ngezina raMambo, Mambo waIsuraeri!”. <sup>14</sup>NaJesu wakaona mwana wembongoro, naye wakagadha padera payo, kudai ngezvezvakanyorwa: <sup>15</sup>“Usatya, iwewe mukunda weZioni. Ringira, mambo wako unouya, akagadha padera pemwana wembongoro!”, <sup>16</sup>Vadzidzi vake avazi kuzvizwisisa izvi pakutanga, asi apo Jesu airikidzwa, naapo vakachizokarakadza kuti izvi zvaiya zvakanyorwa ngendaa yake nokuti vakamuitira izvi. <sup>17</sup>Nembungano iyo yaiya naye apo paakadaidza Razarusi kubva muiba akamumusa kwavakafa yakaita chapupu. <sup>18</sup>Ngeyi ndaa mbungano yakaenda kooshongana nayezeve, ngokuti yaiya yazwa kuti wakaita mushamiso. <sup>19</sup>Ndizvo vaFarisi vakati pakati pavo umwe kunoumweni: “Munoona, amungaiti chiro; ringirai, nyika yeshe inomuteera.” <sup>20</sup>Zvino vaiyapo vaGiriki vamweni pakati peavo vakakwira koodira kudhiri. <sup>21</sup>Ndizvo ava vakauya kunaFiripu, uwo waibva Bhethisaidha reGarire, vakakumbira kwaari vechiti: “Mambo, tinoda kuona Jesu.” <sup>22</sup>Firipu wakaenda, akaronzera Andreu; Andreu wakaenda naFiripu, vakaronzera Jesu. <sup>23</sup>NaJesu wakavapingura echiti: “Awa raguma rokuti Mukororo woMunhu akudzwe. <sup>24</sup>Ngegwinyiso ndinoti kwomuri, kudai tsangu yekoronni isikawi mumavhu nokufa, inondogara iriyo yega; asi kuti ikafa, inozobereka tsangu dzakawanda. <sup>25</sup>Uwo unoda kupona kwake unozokurasha, nouwo unozonda kupona kwake munyika muno, unozokungwarira kupona kusikaperi. <sup>26</sup>Kudai munhu echindishandira, ngaanditeere, kuti pendiri naye muranda wangu unozoapowo; kuti munhu echindishandira, Baba vanozomuremekedza. <sup>27</sup>“Zvino mweya wangu unotambudzika. Neni ndinozotinyi, ‘Baba, ndiponese kubva kuneiri awa here?’ Haiwa, ndiyo ndaa yendakaurya awa iri. <sup>28</sup>Baba, ngarikudzwe zita renyu.” Apapo rakauya izwi rechibva mudenga rechiti: “Ndakarikudza, neni ndinozorikudzazve.” <sup>29</sup>Nembungano yaiya yakaema apo yakarizwa, yakati: “Kwatinhira.” Vamweni vakati: “Ingirosi yaereketa naye.” <sup>30</sup>Jesu wakapingura akati: “Iri izwi arizi kuuya ngenyaya yangu, asi ngenyaya yenyu. <sup>31</sup>Zvino kwaapano kutongwa kwenyika iyi, zvino mutongi wenyika iyi unozorashwa kubanze. <sup>32</sup>Neni, naapo ndamirudzwa kubva panyika, ndinozokweera vanhu veshe kwendiri.” <sup>33</sup>Wakabuya izvi echionisa njira yokufa kwaazifota ndikwo. <sup>34</sup>Ndizvo mbungano yakamupingura yechiti: “Takazwa muMipango kuti Kristu unozogara mhera nariini. Zvino unoronzenyi wechiti: ‘Mukororo woMunhu unosisira kuti amirudzwe?’ Ndiani uyu Mukororo woMunhu?” <sup>35</sup>Jesu wakati kwavari: “Inguva doko kujeka kuchipo pakati penyu. Hambai muchinokujeka, kuti chidima chisamubata; nouwo unohamba muchidima aatongozii paanoenda. <sup>36</sup>Muchinokujeka, tendai kujeka, kuti multe vana vokujeka.” Naapo Jesu aronza izvi, wakabvapo akadzifisha kubva kwavari. <sup>37</sup>Kunyazwi aiya aita mioniso mizhinji pamberi pavo, asi avazi kumutenda. <sup>38</sup>Uku kwaiya kuzadzisa izwi raIsaya muprofeti raakareketa, iro rinoti: “Mambo, ndiani wakatenda izwi redu, nomuoko waMambo Mwari wakaoniswa kunaani?”. <sup>39</sup>Ndizvo vaiya vasikakoni kutenda, ngokuti Isaya unotizve: <sup>40</sup>“Uwo wakapofomadza madziso avo, wakakonzisa mwoyo yavo, kuti vasazoon ngemadziso avo, vazwisise ngomwoyo yavo, vatenderuke neni ndivaponese.” <sup>41</sup>Isaya wakaronza izvi ngokuti wakaona uthende hwake, akareketa ndiye. <sup>42</sup>Kunyazwi zvakanadaro vazhinji vemadzimambo vakamutenda, asi ngendaa yokutya vaFarisi avazi kumutenda ngomuromo, kuti vasadzingwa kubva mumhatso yokudira. <sup>43</sup>Ngokuti vaipinda kuda kukudzwa ngevanhu kunokukudzwa ndiMwari. <sup>44</sup>Jesu wakadaidzira akati: “Uwo unonditenda, aatendi inini akadi, asi unotenda uwo wakandituma. <sup>45</sup>Nouwo unondiona unoonawo wakandituma. <sup>46</sup>Inini ndakauya ndiri kujeka munyika, kuti kunyazwi ndiani unotenda kwendiri asachagara muchidima. <sup>47</sup>Kunyazwi ndiani unozwa mazwi

angu asikaangwariri, andimutongi inini; ngokuti andizi kuuya kootonga nyika, asi koozonesa nyika.<sup>48</sup> Iye unondiramba asikaashiri mazwi angu unaye unomutonga; izwi iro rendakaereketa ndiro rinozomutonga ngezuya rokupera.<sup>49</sup> Ngokuti andizi kutera kudziereketera ngesimba rangu; asi Baba uwo wakandituma iye pachake wakandipanga chendinozoronzana nechendinozoreketa.<sup>50</sup> Neni ndinozia kuti mupango wake uri kupona kusikaperi. Ndizvo izvo zvendinoereketa, ndinozviereketa kudai ngezvandakaronzerwa ndiBaba.”

## 13

<sup>1</sup>Zvino nguva yeDhiri rePhasika isati yaguma, apo Jesu echizia kuti nguva yake yaguma kuti abve munyika muno aende kunaBaba, avada vake avo vaiya munyika, wakavada metsa kumagumo. <sup>2</sup>Vachadya kudya kwemadeekoni, Sathani waiya atopinda mumwoyo mwaJudhasi, mukororo waSimoni Isikarioti, kuti amupire. <sup>3</sup>Jesu, echizia kuti Baba vaiya vamupa zveshe munyara dzake nokuti wakabva kunaMwari nokuti unoenda kunaMwari. <sup>4</sup>wakamiruka kubva pakudya kwemadeekoni, wakakhumura zvokupfeka zvepadera zvake, wakatora jira rokupukuta ndiro, akasungira muchiunu chake. <sup>5</sup>Naapo wakadurura mvura muchidziyo chokushambira, akatanga kushamba tsoka dzevadzidzi nokudzipukuta ngejira raaiya akasungira muchiunu. <sup>6</sup>Ndizvo wakaguma panaSimoni Petro; Petro wakati kwaari: “Mambo, iwewe unoshamba tsoka dzangu here?”. <sup>7</sup>Jesu wakapingura, akati kwaari, “Icho chendinoita inini, iwewe auchizii zvino, asi unozochizwisisa ngesure kweizvi.” <sup>8</sup>Petro wakati kwaari, “Auzoshambi tsoka dzangu nariini.” Jesu wakamupingura, akati, “Dai ndisikakushambi, auna chikoaniswa neni.” <sup>9</sup>Simoni Petro wakati kwaari: “Mambo, kusachaita tsoka dzangu dzega asi nadzo nyara dzangu nesoro rangu.” <sup>10</sup>Jesu wakati kwaari: “Iye washambwa muiri weshe aachatami chiro chimweni kwegwa kushambwa tsoka dzake, asi wacheneswa yaamho. Nemwi mwacheneswa, asi haiwa mweshe.” <sup>11</sup>Ngekuti Jesu waimuzia uwo waizomupira; ndizvo wakati: “Amuzi kucheneswa mweshe.” <sup>12</sup>Naapo Jesu aiya ashamba tsoka dzavo nokutora zvokupfeka zvake nokugara pandau yake, wakati kwavari: “Munozwisisa here chendaita?” <sup>13</sup>Munondidaidza kuti Mudzidzisi nokuti Mambo; nemwi munonasa kuronza, ngokuti ndini. <sup>14</sup>Zvino kudai inini, Mambo noMudzidzisi wenyu, ndashamba tsoka dzenyu, nemwiwo kunosisira kuti mushambane tsoka dzenyu. <sup>15</sup>Ngokuti ndamupa chionero, kuti nemwi muite kudai ngezvandaita kwomuri. <sup>16</sup>Ngegwiniso ndinoti kwomuri, muranda aasimukuru kupinda mambo wake, nokuti wakatumwa aakuri kupinda uwo wakamutuma. <sup>17</sup>Kudai mwechizia izvi zviro, munomuchena kudai mwechizviita. <sup>18</sup>Andiereketi ndimwi mweshe akadi; ndinovazia avo vendakatsanangura; asi kuti chinyorwa chizadzisike chinoti: ‘Uwo unodya chingwa changu, wakandimirudzira chisisinho chake kurwisana neni.’ <sup>19</sup>Zvino ndinomuronzera izvi zvisati zvaitika, kuti apo zvaitika mutende kuti ndini. <sup>20</sup>Ngechokwadi ndinoti kwomuri, iye unoashira uwo wendinotuma unoashira inini; nouwo unondishira unoashira uwo wakandituma.” <sup>21</sup>Naapo Jesu aiya aereketa izvi, wakatambudzika mumweya wake, wakapupura akati: “Ngegwiniso ndinoti kwomuri, umwe wenyu unozondipira.” <sup>22</sup>Vadzidzi vakaningirana vechishamiswa kuti unoreketa ndiani. <sup>23</sup>Umwe wavadzidzi vake waiya akatseama paditi raJesu, uwo waidiwa ndiJesu. <sup>24</sup>ndizvo Simoni Petro wakamukopera akati kwaari: “Tironzere, ndiani waanoereketa ndiye?” <sup>25</sup>Ndizvo uwo wakatseyama paditi raJesu wakati kwaari: “Mambo, ndiani?” <sup>26</sup>Jesu wakapingura akati: “Ndiye uwo wendinozosheya mushuva ndimupe.” Naapo asheya chigurwa chechingwa wakaua Judhasi, mwan waSimoni Isikarioti. <sup>27</sup>Naapo ngesure kwechigurwa chechingwa, Sathani wakapoterwa kwaari. Ndizvo Jesu wakati kwaari: “Izvo zvounoda kuita zviite ngokukasira.” <sup>28</sup>Paiya pasina munhu pakudya wakazia singwisingwi yezvaakaereketa kwaari. <sup>29</sup>Ngokuti vamweni vakapinimidza kuti, ngokuti Judhasi waiya nenyede yemare, Jesu waimuronzera echiti, “Tenga zvatinoda paDhiri rePhasika,” nokuti ape chiro kuvarombo. <sup>30</sup>Ndizvo iye aashira chigurwa chechingwa, paripo wakabuda kuenda. Hwaiya hwaa usiku. <sup>31</sup>Naapo aiya abuda, Jesu wakati: “Zvino Mwana woMunhu wakudzwa naMwari wakudzwa mukati mwake. <sup>32</sup>Kudai Mwari akudzwa mukati mwake, Mwari unozomukudzawo mukati mwake emene, naye unozomukudza paripo apapo. <sup>33</sup>Vana vadoko, inguva doko ndichinemwi. Munozonditsvaka; kudai ngezvandakaronza kuvaJudha, ndizvo ndinoti kwomuri: ‘Pendinoenda, amukoni kuuyapo.’” <sup>34</sup>Ndinomupa mupango mutsva, kuti mudane umwe kunoumweni; kudai ndini ndakamuda, ngokudaro imwimwiwo mudane. <sup>35</sup>Ngeichi vanhu veshe vanozozia kuti imwimwi muri vadzidzi vangu: kudai muno rudo umwe kunoumweni.” <sup>36</sup>Simoni Petro wakati kwaari: “Mambo, unoenda kuri?” Jesu wakapingura, akati: “Pendinoenda, aukoni kunditeera zvino; asi unozoteera sure kweizvi.” <sup>37</sup>Petro wakati kwaari: “Mambo, andikoni kukuteera zvino ngenyi? Ndinozofa ngepamusoro pako.” <sup>38</sup>Jesu wakapingura, akati: “Unozofa ngepamusoro pangu here? Ngegwiniso ndinoti kwomuri, jongwe arizoriri usati wandiramba katatu.

## 14

<sup>1</sup>“Mwoyo yenyu isatambudzika; tendai kunaMwari, mutendewo kwendiri. <sup>2</sup>Mumhatso mwaBaba angu huriyo ugaro hwakawanda. Kudai zvisakadaro, ndaizodai ndisikazi kumuronzera here kuti ndinoenda koomunasirira ugaro? <sup>3</sup>Kudai ndechienda koomunasirira ugaro, ndinozouyazve nokumuashira ndemene, kuti pendiri inini, nemwi mungazoapowo. <sup>4</sup>Nependinoenda munoizira njira.” <sup>5</sup>Thomasi wakati kwaari, “Mambo, atizii pounoenda. Njira tingaizira ngenyi? Jesu wakati kwaari, “Inini ndiri njira negwiniso nokupona. Akuna unouya kunaBaba, asikaui ndini. <sup>7</sup>Kudai mwakandizia, mwaizodai mwakamuzia Baba anguwo. Kubvira pano munomuzia, nemwi mwamuona. <sup>8</sup>Firipu wakati kwaari: “Mambo, tipangidzire Baba, nesu tikwaniswe”. <sup>9</sup>Jesu wakati kwaari, “Ndakagara nemwi mukuwo wakadai kureba, asi ausati wandizia here, Firipu? Iye wakandiona inini wakaona Baba. Unoronza ngenyi kuti: ‘Tipangidzire Baba?’” <sup>10</sup>Autendi here kuti inini ndiri mukati mwaBaba naBaba vari mukati mwangu? Mazwi endinoereketa kwomuri andidziereketeri ngesimba rangu; asi Baba vanogara mukati mwangu ndivo vanoita mishando yavo. <sup>11</sup>Tendai inini kuti ndiri mukati

mwaBaba naBaba vari mukati mwangu; asi kudai musikatendi kudaro, tendai ngepamusoro pemishando yemene.

<sup>12</sup>Ngegwiniso ndinoti kwomuri, uwo unonditenda mishando yendinoita unozoitawo; mishando yakakura kupinda iyi unozoiita, ngokuti inini ndinoenda kunaBaba. <sup>13</sup>Kunyazwi chiinyi chomunozokumbira ngezina rangi ndinozochiita, kuti Baba vairikidzwe kubudikidza ngoMwana. <sup>14</sup>Kudai mwanazokumbirenyi kwendi ngezina rangi, inini ndinozochiita., <sup>15</sup>Kudai mwechindida, munozongwarira mipango yangu <sup>16</sup>Neni ndinozokumbira Baba, naye unozomupa umweni Muembedzeri, kuti agare nemwi nokusikaperi. <sup>17</sup>Ndiye Mweya wegwiniso; nyika aikoni kumuashira, ngokuti aimuoni nokuti kumuzia. Imwimwi munomuzia, ngokuti unogara nemwi, naye unozogara mukati mwenyu. <sup>18</sup>“Andizomusii muri nherera; ndinozouya kwomuri. <sup>19</sup>Kuchinenguva doko nenyika aichazondioni, asi imwimwi munozondiona; ngokuti inini ndinopona, nemwi munozoponawo. <sup>20</sup>“Ngeiro zuva munozozia kuti inini ndiri mukati mwaBaba angu, nemwi muri mukati mwangu, neni ndiri mukati mwenyu. <sup>21</sup>Uwo unemipango yangu echiingwarira, uwo ndiye unondida; nouwo unondida unodiwa ndiBaba angu, neni ndinozomuda nokudzionisa pachangu kwaari. <sup>22</sup>Judhasi (haiwa Isikarioti) wakati kwaari: “Mambo, unozoitaitirenyi kuti unozodzionisa kwetiri, usikadzionisi kunyika?” <sup>23</sup>Jesu wakamupingura, akati kwaari: “Kunyazwi ndiani unondida unozongwarira mazwi angu, naBaba angu vanozomuda, nesu tinozouya kwaari tiite ugaro hwedu pamwepo naye. <sup>24</sup>Uwo usikandidi aangwariri mazwi angu. Neizwi romunozwa arisirangu akadi, asi ngeraBaba avo vakandituma. <sup>25</sup>“Izvi zviro ndamuronzera apo ndichakagara nemwi. <sup>26</sup>Asi Muembedzeri, Mweya Wakachena, waachazotuma Baba ngezina rangi, uwo unozomudzidzisa zviro zveshe, amucherechedzise zveshe zvendakamuronzera. <sup>27</sup>Kunyarara ndinokusiya kwomuri; kunyarara kwangu ndinomupa. Andimupi kudai ngokupa kwenyika. Mwoyo yenyu isatambudzika, isakarukazve. <sup>28</sup>Mwakazwa kuti ndakati kwomuri: ‘Ndinoenda, neni ndinozouyazve kwomuri.’ Kudai mwakandida, mwaizodakara kuti ndinoenda kunaBaba, ngokuti Baba vari vakuru kwendi. <sup>29</sup>zvino ndamuronzera zvisati zvaitika, kuti apo zvozoitika mutende. <sup>30</sup>Ngesure kweizvi andichazoereketi zvizhinji nemwi, ngokuti mutongi wenyika iyi unouya. Aana simba padera pangu. <sup>31</sup>Asi ndinoita kudai ngezvaakandipanga Baba, kuti nyika izie kuti ndinomuda Baba. Mirukai, ngatibve pano.

## 15

<sup>1</sup>“Inini ndiri muvhini wegwiniso naBaba angu murimi. <sup>2</sup>Dhai dzeshe dzirimukati mwangu asikabari michero, unoadusa, nawo eshe anobara michero unootongora, kuti abare michero yakapinda kuwanda. <sup>3</sup>Imwimwi muri vakatocheneswa ngeizwi rendakaereketa kwomuri. <sup>4</sup>Garai mendi, neni mukati mwenyu. Kudai ngedai risikakoni kubara michero rega, risikagari mukati mwomuvhini, zvakadaro nemwi kudai musikagari mukati mwangu. <sup>5</sup>Inini ndiri muvhini, imwimwi muri madhai. Uyo unogara mukati mwangu, neni ndiri mukati mwake, ndiye unobara michero yakawanda, ngokuti ngepabanze pangu imwimwi amungakoni kuita chiro. <sup>6</sup>Kunyazwi ndiani usikagari mukati mwangu, unorashwa kubanze kudai ngedai, rinofota; nematai vanoangandiza, vaaposhere mumuriro nawo anotsva. <sup>7</sup>Kudai mwechigara mukati mwangu, nemazwi angu anogara mukati mwenyu, munozokumbira izvo zvomunoda, nazvo zvinozoiita kwomuri. <sup>8</sup>Ngeizvi Baba angu vanokudzwa, kuti mubare michero yakawanda, ngokudaro muite vadzidzi vangu. <sup>9</sup>Kudai ndiBaba vakandida, ngokudaro neni ndakamudawo; garai murudo vangu. <sup>10</sup>Kudai mwechingwarira mipango yangu, munozogara murudo rwangu, kudai ndini ndakangwarira mipango yaBaba angu nokugara murudo rwake. <sup>11</sup>“Ndakaereketa izvi kwomuri, kuti kudakara kwangu kugare kwomuri, nokuti kudakara kwenyu kuzadzisike. <sup>12</sup>Uyu ndiwo murairo wangu, kuti mudane kudai ndini ndakamuda. <sup>13</sup>Akuna munhu unorudo rukuru kupinda urwu, kuti munhu afe ngepamusoro peshamwari dzake. <sup>14</sup>Imwimwi muri shamwari dzangu kudai mwechiita izvo zvendinomupanga. <sup>15</sup>Andichamudaidzi kuti muri varanda, ngokuti muranda aazii chinaitwa ndiMambo wake; asi ndakamudaidza kuti muri shamwari, ngokuti zveshe zvendakazwa kunaBaba angu ndakazviziisa kwemuri. <sup>16</sup>Amusi imwimwi makanditengai asi inini ndakamuketa ini ndaka mutuma kuti muende kobara muchero nekuti muchero yenyu igarei kut kungazwi chini chomunozokumbira kuna baba ngezita rangi, vamupe kwemuri. <sup>17</sup>Ndinokubvunza kuti mudanane umwe neumwe. <sup>18</sup>Kana kut nyika yechimuzonda, ziya meiziya kut isat yamundau yakatanga, kuzonda ini. <sup>19</sup>Kudai muri wmunyika, myika yaida kumuda, kunge muri wavo; ngendaya yekut amusi wemunyika. Ndakamuketa kuti mubude munyika. <sup>20</sup>Rangarirai choko rendakabvubza; mushand asimukuru kana mambo wake. wakanditera, wachamuterawo kana mukaterera choko rangi achaterawo choko rangi. <sup>21</sup>Vana vachaita zveche ngepamusoro pezita rangi, bati avaziyi kuti n diyani wakandituma. <sup>22</sup>Kudai inini ndisina kuya, uzvendaindisina kuwabvunza, vaidai wasina kutadza; asi zvinzvi avana kukambira zvitadzo zvao. <sup>23</sup>kune uya unondi zonda, unozonda baba vangu. <sup>24</sup>kudai inini ndisina kuvaititra kwavari iri basa risina kuzva ngeumweni. vaidai wasina kuchaicha, asim zvino vakawana vakazonda teche inini na baba vangu. <sup>25</sup>Izvi zvinoitika kuti machoko akanyorwa mumupango yavo ngekuti, kuti zvitike; vzkandizana pasina nyaya. <sup>26</sup>Paachaya munyaradzi uwo wendinozotuma kwemuri echibva kuna baba, mweya wengwingiso uyu unobva kuna baba, unozondipupurira. <sup>27</sup>Kuna nemwiwo muchazofakaza ngekuti mwauiya neni kubvura pekunga

## 16

<sup>1</sup>Ndakareketa izvi zveshe kwomuri kuti musapumhuniswa. <sup>2</sup>Vanozomudzanga kubva mumhatso dzavo dzokudira; eya, awa richauya apo kunyazwi ndiani unomuraya, unozopinimidza kuti unoshandira Mwari. <sup>3</sup>Navo vanozoitaitirenyi ngokuti avazi kumuzia Baba nokuti inini. <sup>4</sup>Asi ndakamuronzera izvi zviro, kuti apo raguma awa razvo mucherechedze kuti ndakamuronzera ndizvo. “Asi andizi kumuronzera izvi zviro kubvira pakutanga, ngokuti ndaiya ndichinemwi. <sup>5</sup>Asi zvino ndinoenda kunouwo wakandituma; akuna naumwe wenyu unondibvunza kuti, ‘Unoenda kuri?’, <sup>6</sup>Asi ngokuti

ndamuronzera izvi zviro, mwoyo yenyu yazara ngokutambudzika.<sup>7</sup> Asi ndinomuronzera gwinyiso; kuti zvakapinda kumunakira kuti ndiende, ngokuti kudai ndisikaendi, Muembedzeri aazouyi kwomuri; asi kuti ndikaenda, ndinozomutuma kwomuri.<sup>8</sup> Naapo auya, unozoonisa nyika ngendaa yokushaisha, yokururama nendaa yokutongwa; ngendaa yokushaisha, ngokuti avanditendi; ngendaa yokururama, ngokuti ndinoenda kunaBaba, nemwi amuchazondioni; ngendaa yokutongwa ngokuti mutongi wenyika ino wakatongwa.<sup>12</sup> Ndichine zviro zvizhinji zvokumubuire, asi amukoni kuzviashira zvino.<sup>13</sup> Naapo Mweya wegwiniso wauya, unozomutungamirira mugwiniso reshe; ngokuti aazodziereketeri ngesimba rake, asi zvaanozozwa, ndizvo zvaanozoreketa, naye unozomubuire zviro zvichauya.<sup>14</sup> Uwo unozondikudza, ngokuti unozoashira zvokwangu nokuzvibuya kwamuri.<sup>15</sup> Zveshe zvaanazvo Baba ngezvangu; ndiyo ndaa ndakati unozotora zvokwangu nokuzvironza kwomuri. 16 Kwenguva doko nemwi amuchazondioni, nenguva dokoze nemwi munozondiona.”<sup>17</sup> Vamweni vevadzidzi vake vakareketa pachavo umwe kunoumweni vechiti: “Chiinyi ichi chaanoreketa kwetiri kuti, ‘Inguva doko nemwi amuchazondioni, nenguva dokoze nemwi munozondiona,’ echitizve, ‘Ngokuti ndinoenda kunaBaba?’ ”<sup>18</sup> Ndizvo vakati: “Unoronzenyi echiti, ‘Inguva doko?’ Atizii kuti unoronzenyi<sup>19</sup> Jesu wakazia kuti vaida kumubvunza; naye wakati kwavari: “Munobvunzana here pakati penyu ngeicho chendaronza kuti, ‘Inguva doko nemwi amuchazondioni, nenguva dokoze nemwi munozondiona?’ ”<sup>20</sup> Ngegwiniso ndinoti kwomuri, munozochema nokuboorera, asi nyika inozodakara; imwimwi munozotambudzika, asi kutambudzika kwenyu kunozotsandudzwa kuita kudakara.<sup>21</sup> Naapo dzimai roopotwa ngokubara rinotambudzika, ngokuti nguva yaro yaguma; asi rabara mwana, arichakaradzi ngokurwadziwa, ngendaa yokudakara kuti munhu wabarwa munyika.<sup>22</sup> Nemwi munozotambudzika zvino, asi ndinozomuonazve nemwoyo yenyu inozodakara, nokudakara kwenyu akuna munhu unokudusa kubva kwomuri.<sup>23</sup> Ngeiro zuva amuzondibvunzi chiro. Ngegwiniso ndinoti kwomuri, kunyazwi chiinyi chomunozokumbira kunaBaba ngezina rangu, unozochipa kwomuri.<sup>24</sup> Kuguma nanyamashi amuzi kukumbira chiro ngezita rangu. Kumbirai nemwi munozoashira, kuti kudakara kwenyu kuzadzisike.<sup>25</sup> Ndakavereketa izvi kwomuri ngemiedzaniso. Asi nguva inouya apo yandichingazovereketi kwomuri ngemiedzaniso, asi ndinozomubuire pamhene ndiBaba.<sup>26</sup> Ngeiro zuva munozokumbira ngezita rangu; neni andirobuyi kwomuri kuti ndinozomukumbirira kunaBaba; ngokuti Baba vemene vanomuda, ngokuti imwimwi mwakandida nemwi mwakatenda kuti ndakabva kunaMwari.<sup>28</sup> Ndakabva kunaBaba, neni ndakauya munyika; zve, ndinosiya nyika, ndechienda kuna Baba.”<sup>29</sup> Vadzidzi vake vakati kwaari: “izwanhi, zvino wovereketa pambene, haiwa ngomuedzaniso.<sup>30</sup> Zvino tinozia kuti unozia zviro zveshe, autami munhu naumwe kuti akubvunze; ngeichi tinotenda kuti iwewe wakabva kunaMwari.”<sup>31</sup> Jesu wakavapingura echiti, “Zvino munotenda here?”<sup>32</sup> Ningirai, nguva hinouya, eya ratoguma, naapo munozoparadzirwa munhu wesse echienda kanyu kwake nokundisiya ndega. Asi andiri ndega akadi, ngokuti Baba vaneni.<sup>33</sup> Izvi ndakamubuire kuti mwendi muone kunyarara. Munyika munozoa nemadambudziko. Asi shingai mwoyo; ndainyisa nyika”.

## 17

<sup>1</sup>pavakabva kubuda izvi, Jesu aereketa mazwi aya, wakamurudza madziso ake mudenga, akati: “Baba, yakwana nguwa. ropafadza Mwana wenyu kuti Mwana amuirikidze. kudai ngezvemwakamupa simba padera penyama yeshe, kuti avape kupona kusikaperi avo veshe vemwakamupa.<sup>3</sup> Uku ndikwo kupona kusikaperi, kuti vamuzie imwimwi, Mwari ega wegwiniso, naJesu Kristu uwo womwakatuma.<sup>4</sup> Inini ndakamuirikidza munyika, ndakapedza mushando womwakandipa kuti ndiuite.<sup>5</sup> Nazvino imwimwi, Baba, ndiirikidzei mwemene ngokuirikidzwa ukwo kwendaiya nakwo nemwi, ngepamberi nyika isati yasikwa.”<sup>6</sup> Ndakaita kuti zina renyu riziikanwe kune avo vanhu vomwakandipa kubva munyika. Vaiya venyu, nemwi mwakavapa kwendi, navo vakangwarira izwi renyu.<sup>7</sup> Zvinezwi vanoza kuti zveshe zvemwakandipa zvakabva kwemuri; ngei machoko owakandipa ndakaapawo kwavari, navo vakaashira, vakazia ngegwiniso kuti ndakabva kwomuri; vakatenda kuti imwimwi mwakandituma.<sup>9</sup> Ndinovakumbirira; andikumbiriri nyika, asi avo vomwakandipa, ngokuti vari venyu.<sup>10</sup> Zveshe zvangu ngezvenyu nezvenyu ngezvangu; neni ndinoiririkidzwa mwavari.<sup>11</sup> Inini Andichimuhika, asi vachirimwo munyika, neni ndouya kwomuri. Baba Vakachena, vangwarirei muzina renyu, iro romwakandipa, kuti vaite umwe kudai tisu tiri umwe.<sup>12</sup> Apo ndichinarivo, ndakavangwarira muzita renyu, iro romakandipa. Ndakavarinda, akuna naumwe wavo wakarashika, asi mamwa wokurashwa, kuti zvinorwa zvizadzisike.<sup>13</sup> Asi zvino ndinouya komuri, neizvi zviro ndinoreketa ndizvo munyika, kuti kudakara kwangu kuzadzisike mukati mwavo.<sup>14</sup> Ndakapa kwavari izwi renyu, nenyika yakavazonda ngokuti avasiri venyika akadi, kudai ndini ndisiri wenyika.<sup>15</sup> Andikumbiri kuti muvaduse kubva munyika, asi kuti muvanguwarire kubva kunouwo wakashata.<sup>16</sup> Avasiri venyika akadi, kudai ndini ndisiri wenyika.<sup>17</sup> Vachenesei mugwiniso; izwi renyu igwiniso.<sup>18</sup> Kudai ngezvomwakandituma munyika, ngokudaro neniwo ndinovatuma munyika.<sup>19</sup> Ngendaa yavo ndinodzichenesa, kuti navowo vachenese mugwiniso.<sup>20</sup> Andikumbiriri ava vega, asi naavo vanozotenda kwendi ngeizwi ravo,<sup>21</sup> kuti veshe vaite umwe; kudai ndimwi, Baba, muri mukati mwangu, neni ndiri mukati mwenyu, kuti navo vagare mukati mwedu, kuti nyika itende kuti imwimwi mwakandituma.<sup>22</sup> Nouthende hwomwakandipa, ndakahupawo kwavari, kuti vaite umwe kudai tisu tiriumwe;<sup>23</sup> inini mukati mavo nemwi mukati mwangu, kuti vaitwe vakaperera vari umwe, kuti nyika izie kuti imwimwi mwakandituma nokuti mwakavada kudai ngezvemwakandida inini.<sup>24</sup> Baba, ndinoda kuti avowo vomwakandipa vaapo pendiri kuti vaningire uthende hwangu, uhwo hwomwakandipa inini, murudo renyu nyika isati yasikwa.<sup>25</sup> Baba vakarurama, nyika aizi kumuzia asi inini ndinomuzia; naava vakazia kuti imwimwi mwakandituma.<sup>26</sup> Neni ndakavaziisa

zita renyu, neni ndichaita kuti riziikanwe, kuti rudo uro rwomakandida ndirwo rugare mukati mavo, neni ndigare mukati mavo.”

## 18

<sup>1</sup>Naapo Jesu areketa mazwi aya, wakabuda nevadzidzi vake, vakaambuka ruseri rwebani reKedhironi, apo paiya nomunda, wapotera mukati mwawo nevadzidzi vake. <sup>2</sup>Zvino Judhasi, uwo wakamupira, waizia ngendau iyo, ngokuti Jesu waishonganamwo kazhinji nevadzidzi vake. <sup>3</sup>Ndizvo Judhasi wakatora chikwata chemasoja nevarindi vamweni vaibva kuvapristi vakuru nevaFarisi, vakaendapo vanezvibani nemasasi nezvokurwa ndizvo. <sup>4</sup>Zvino Jesu, echizia zveshe zvaizomugumira, wakabuda kwavari, akati, “Munotsvaka anani?” <sup>5</sup>Vakamupingura, vakati, “Jesu weNazaretha.” Wakati kwavari: “Ndini.” Judhasi, uwo wakamupira, waiya akaema navo. <sup>6</sup>Naapo avaronzera kuti, “Ndini,” vakaita fundamutete, vakawa pashi. <sup>7</sup>Ndizvo wakavabvunzazve, akati, “Munotsvaka anani?” Navo vakati: “Jesu weNazaretha.” <sup>8</sup>Jesu wakavapingura, akati: “Ndamubaira kuti ndini. Ndizvo, kuti mwechitsvaka inini, rekerai vanhu ava vaende.” <sup>9</sup>Izvi kwaiya kuzadzisika kweizwi, iro raakareketa rinoti: “Avo vomwakandipa andizi kurashikirwa naumwe wavo.” <sup>10</sup>Zvino Simoni Petro waiya aneshoti, wakaishwamura, akatema hloko yomupristi mukuru, akagura nzee yake yokumudyo. Zina rehloko iyo uwo raiya Marikusi. <sup>11</sup>Ndizvo Jesu wakati kunaPetro: “Hwirinza shoti yako mumakara ayo! Tsani yaakandipa Baba andizoimwi here?” <sup>12</sup>Ndizvo chikwata chemajoni nenduna nevarindi vevaJudha vakabata Jesu, vakamusunga. <sup>13</sup>Navo vakamubaira kutanga kunaAnasi, ngokuti waiya muzvere waKaiafasi, uwo waiya mupristi mukuru ngegogero., <sup>14</sup>Ndiye Kaiafasi uwo wakanyowedza vaJudha kuti kwaidikanwa kuti munhu umwe afire vanhu., <sup>15</sup>Simoni Petro wakateera Jesu, nomudzidzi umweni. Zvino uwo mudzidzi waiziikanwa kumupristi mukuru, wapotera naJesu muruwanze rwomupristi mukuru, <sup>16</sup>Asi Petro akaema pamusiwo kubanze. Ndizvo mudzidzi umweni, uwo waiziikanwa kumupristi mukuru, wakabuda pabanze, akaereketa kunouwo waingwarira musiwo, akapotedza Petro. <sup>17</sup>Ndizvo musikana uwo waingwarira musiwo wakati kunaPetro, “Newe auri umwe here wevadzidzi vouyu munhu?” Iye wakati, “Andinipi.” <sup>18</sup>Zvino varanda nevarindi vakabasira muriro wamasimbe, ngokuti kwaiya nechando, navo vaiya vakaema vechigota muriro pachavo. NaPetro wakaemawo navo, echigota pachake. <sup>19</sup>Ndizvo mupristi mukuru wakabvunza Jesu ngendaa yevadzidzi vake nokudzidzisa kwake. <sup>20</sup>Jesu wakamupingura, akati: “Inini ndakareketa pamhene kuvanhu venyika; nguva dzeshe ndakadzidzisa mumhatso dzokudira nomuTemperi, apo paiungana veshe vaJudha. Andizi kureketa chiro ngokufishika. <sup>21</sup>Unondibvunzirenyi? Bvunza avo vakazwa zvendakaereketa kwavari; vanoza zvendakaereketa inini. <sup>22</sup>Naapo aiya aereketa izvi, umwe wevarindi vaiya vakaema apo wakamakaya Jesu ngepama echiti, “Unopingura mupristi mukuru kudaro here?” <sup>23</sup>Jesu wakamupingura echiti: “Kudai ndareketa zvakashata, pupura ngezvakashata. Asi kudai ndareketa zvakana, unondimamisirei?” <sup>24</sup>Ndizvo Anasi wakamutumira akasungwa kunaKaiafasi mupristi mukuru. <sup>25</sup>Zvino Simoni Petro wakaema echigota muriro. Ndizvo vakati kwaari: “Newe auri umwe here wevadzidzi vake?” Iye wakavapingura, akati: “Inini andisiri umwe wavo.” <sup>26</sup>Umwe wevaranda vomupristi mukuru, waiya hama youwo waakatema nzee Petro, wakati: “Andizi kukuona unaye mumunda here?” <sup>27</sup>Ndizvo Petro wakarambaze; paripo jongwe rakarira., <sup>28</sup>Ndizvo vakakweya Jesu kubva kunaKaiafasi vechienda naye kumhatso yokutongera. Kwaiya achimangwanani. Ivo vemene avazi kupotera mumhatso yokutongera, kuti vasazosvipiswa, asi kuti vadye Phasika. <sup>29</sup>Ndizvo Piratu wakabuda kwavari, akati, “Indaa yenyi yomunoitira uyu munhu?” <sup>30</sup>Vakapingura, vakati kwaari, “Kudai uyu munhu asiri muiti wezvakashata, taidai tisikazi kumupira kwouri.” <sup>31</sup>Ndizvo Piratu wakati kwavari: “Mutorenyi imwimwi pachenyu mumutonge kudai ngemipango yenyu.” VaJudha vakati kwaari: “Akutenderwi kuti isusu tiuraye munhu nokuti ngouri.” <sup>32</sup>Uku kwaiya kuti rizadzisike izwi iro raakareketa Jesu echionisa kuti injiranyi yaaizofa ndiyo. <sup>33</sup>Ndizvo Piratu akapindazve mumhatso yokutongera, adaidza Jesu, akati kwaari: “Iwewe uri mambo wavaJudha here?” <sup>34</sup>Jesu wakapingura echiti, “Unoereketa izvi pachako here nokuti wazvibuirwa ngevamweni ngendaa yangu?” <sup>35</sup>Piratu wakapingura, akati: “Inini ndiri muJudha here? Dzinza rako nevapristi vakuru vakakupira kwendiri. Chiinyi chowakamboita?” <sup>36</sup>Jesu wakapingura, akati: “Umambo hwangu angohwomunyika muno akadi. Kudai umambo hwangu hwaiya hwomunyika muno, varanda vangu vangadai vakandirwira, kuti ndisapirwa kuvaJudha. Asi zvino umambo hwangu auhuri hwomuno akadi.” <sup>37</sup>Ndizvo Piratu wakati kwaari: “Ndizvo uri mambo here?” Jesu wakapingura akati: “Iwewe unorobuya kuti ndiri mambo. Ngeiyi ndaa ndakabarwa, ngeiyi ndaa ndakauya munyika, kuti ndipupurire gwinyiso. Kunyazwi ndiani uri wegwinyiso unozwa izwi rangu.” <sup>38</sup>Piratu wakati kwaari: “Gwinyiso chiinyi?” Aereketa izvi, wakabudazve kuvaJudha, akati kwavari, “Andioni ndaa kwaari.” <sup>39</sup>Asi imwimwi muno mutoo wokuti ndisunhure umwe kwomuri ngePhasika. Ndizvo munoda here kuti ndisunhure kwomuri mambo wevaJudha?” <sup>40</sup>Ndizvo vakazhambarazve vechiti: “Haiwa uyu munhu, asi Bharabhasi!” Zvino Bharabhasi waiya dzongoni.

## 19

<sup>1</sup>Zvino Piratu wakatora Jesu, akamuchaya. <sup>2</sup>Nemasoja akaruka dzungudza reminzwa, akariisa padera pesoro rake, akamupfeka gauni rakatsvukuruka. <sup>3</sup>Akauya kwaari echiti: “Mwauya, mambo wevaJudha!” Nawo aimuchaya ngenyara dzawo. <sup>4</sup>Naapo vapristi vakuru nevarindi vamuona, vakazhambarara vechiti: “Mukohomere, mukohomere!” Piratu wakati kwavari: “Mutorenyi imwimwi mumukohomere, ngokuti andioni ndaa kwaari.” <sup>5</sup>NaPiratu wakabudazve, akati kwavari: “Ningirai, ndinomubudisa kwomuri, kuti muzie kuti andioni ndaa kwaari.” <sup>6</sup>Ndizvo Jesu wakabuda, akapfeka dzungudza reminzwa negauni rakatsvukuruka. Piratu wakati kwavari, “Ringirai uyu munhu!” <sup>7</sup>VaJudha vakamupingura, vakati: “Tinechironzo, ngendaa yechironzo icho unosisira kuti afe, ngokuti iye wakadziita Mwana waMwari.” <sup>8</sup>Naapo



Piratu azwa mazwi aya, wakapinda kutya.<sup>9</sup> wakapinda mumhatso yokutongera, akati kuna Jesu: “Unombobva pari?” Asi Jesu aazi kumupingura.<sup>10</sup> Ndizvo Piratu wakati kwaari: “Aundipinguri here? Auzii here kuti ndinesimba rokukusunhura, neni ndine simba rokukukohomera?”<sup>11</sup> Jesu wakamupingura, akati: “Aungakoni kuanesimba padera pangu kuti usikazi kuripuwa rechibva mudenga; ndizvo uwo wakandipira kwouri unokushaisha kwakapinda kukura.”<sup>12</sup> Naapo Piratu wakatsvaka kumusunhura, asi vaJudha vakazhambarara vechiti: “Kuti ukusunhura munhu uyu, auri shamwari yaSiza akadi. Kunyazwi ndiani unodziita mambo unoereketa kumukira Siza.”<sup>13</sup> Naapo Piratu azwa aya mazwi, wakabudisa Jesu kubanze, wakagara pachigaro chokutongera ndaa, pandau inozwi Yakagangatwa Mapuwe, asi ngokwechiHebheru inozwi Gabatha.<sup>14</sup> Zvino raiya zuva rokunasirira Phasika, rooda kuita awa rechitanhatu. Wakati kuvaJudha, “Ringirai mambo wenyu.”<sup>15</sup> Ndizvo vakazhambarara vechiti, “Mudusenyi, mudusenyi, mukohomere!” Piratu wakati kwavari, “Ndokohomera mambo wenyu here?” Vapristi vakuru vakapingura vechiti, “Isusu atina mambo asi Siza.”<sup>16</sup> Ndizvo wakamupira kwavari kuti akohomerwe. Ndizvo vakatora Jesu.<sup>17</sup> Naye wakabuda echitwara muchinjiko kuenda kundau inozwi Denhenya, iyo inodaidzwa ngokwechiHebheru kuti, Gorogotha.<sup>18</sup> Apo ndipo pevakamukohomera, pamwepo nevairi vamwe, umwe ngeino noumweni ngeiyo, naJesu ngepakati.<sup>19</sup> Piratu wakanyorazve chinyorwa, akachiisa padera pomuchinjiko. Uku ndikwo kunyorwa kwacho: “JESU WENAZARETA, MAMBO WEVAJUDHA.”<sup>20</sup> VaJudha vazhinji vakadzidza ichi chinyorwa, ngokuti ndau iyo yaakakohomerwa Jesu yaiya pasinde pedhorobha; nacho chaiya chakanyorwa ngechiHebheru nechiRoma nechiGiriki.<sup>21</sup> Ndizvo vapristi vakuru vevaJudha wakati kunaPiratu, “Usanyora kuti, ‘Mambo wevaJudha,’ asi kuti, ‘Iye wakati, ndiri mambo wevaJudha.’”<sup>22</sup> Piraatu wakapingura akati: “Chendanyora, ndanyora.”<sup>23</sup> Naapo masoja aiya akohomera Jesu, akatora zvokufuka zvake, akazvipaura kuita mirwi mirongomuna, soja rimwe ngarimwe murwi waro. Vakatorazve gauni rake; asi gauni rake nehanzu yake raiya risina musono, asi rakarukwa kubvira ngedera kwaro metsa kubani kwaro.<sup>24</sup> Ndizvo vakaronzerana pakati pavo vechiti: “Tisaribaura, asi ngatiite mabhigidha, tione kuti ngerani,” kuti chinyorwa chizadzisike chinoti: “Vakakoanisirana zvokufuka zvangu pakati pavo, negauni rangu rakaitirwa mabhigidha.” Ndizvo masoja akaita izvi,<sup>25</sup> Asi kwaiya kwakaemapo pasinde pomuchinjiko waJesu mai ake, nahurwani amai ake, Maria mukadzi waKropasi, naMaria Magadhareni.<sup>26</sup> Naapo Jesu aona mai ake nomudzidzi uwo waaida vechiema pasindepo, wakati kunamai ake: “Dzimai, wona mukororo wako!”<sup>27</sup> Zvino wakati kunamudzidzi uwo: “Wona mai ako!” Kubvira ngeawa iro mudzidzi uwo wakavatora kuti vagare kanyi kwake.<sup>28</sup> Ngesure kweizvi Jesu, echizia kuti zviro zveshe zvaiya zvaperera, kuti chinyorwa chizadzisike, wakati: “Ndapera ngenyota.”<sup>29</sup> Paiya nechidziyo chakazara ngevhini rairungura; ndizvo vakaisa siponji chakazara ngevhini rairungura pachimuti chehisopi, vakachiisa pamuromo wake.<sup>30</sup> Naapo Jesu aashira vhini rairungura, wakati: “Zvaperera.” Wakakotamisa soro rake naye wakapa mweya wake.<sup>31</sup> Zvino raiya zuva rokunasirira Phasika. VaJudha vakakumbira Piratu kuti mirenje yavo igurwe, vaduswepo kuti miiri isagara pamuchinjiko ngezuva reSabatha, ngokuti Sabatha iro raiya zuva guru.<sup>32</sup> Ndizvo majoni akauya, akagura mirenje yowokutanga neyoumweni, avo vakakohomerwa naye.<sup>33</sup> Asi apo vaguma panajesu, vakaona kuti waiya afa, avazi kugura mirenje yake.<sup>34</sup> Asi umwe wemajoni wakabaya parutii pake ngomukhondo, paripo pakabuda ngazi nemvura.<sup>35</sup> Nouwo wakazviona wakaita chapupu, nechapupu chake chine gwinyiso, naye unozia kuti unoereketa gwinyiso, kuti nemwiwo mutende.<sup>36</sup> Ngokuti izvi zvakaite kuti chinyorwa chizadzisike chinoti, “Akuna godo rake narimwe rinozogurwa.”<sup>37</sup> Nechinyorwa chimwenizve chinoti, “Vanozmuringira uwo wevakabaya.”<sup>38</sup> Ngesure kweizvi, Josefa waArimathia, uwo waiya mudzidzi waJesu, asi ngokufishika ngokutya vaJudha, wakakumbira Piratu kuti aduse muiri waJesu naPiratu wakamutendera. Ndizvo wakauya, akadusa muiri wake. Nikodhemusiwo wakauya, uwo wakauya kwaari<sup>39</sup> pakutanga usiku, echiuma mutombo wakaita mvemve wemhura nowemuaro, wairema kuda kuguma makhirogiramu makumi matatu.<sup>40</sup> Ndizvo vakatora muiri waJesu, vakauputira ngejira rakachena pamwepo nomutombo wemakha unonuhwira, kudai ngomutoo wevaJudha wokuika.<sup>41</sup> Zvino kwaiyapo munda pandau iyo yaakakohomerwa, nomumunda uwo mwaiya neiba idzva risikazi kumboikwamwo munhu.<sup>42</sup> Ndizvo vakaikamwo Jesu, ngokuti raiya zuva rokunasirira revaJudha, ngokuti iba iro raiya pasindepo.

## 20

<sup>1</sup>Zvino ngezuva rokutanga revhiki, Maria Magadhareni wakaenda kuiba mangwanani kuchakasvipa, wakaona buwe rakamburumbudzwa kubva paiba.<sup>2</sup> Ndizvo wakarumba, akaenda kunaSimoni Petro nokunomudzidzi umweni, uwo waaida Jesu, akati kwavari: “Vakadusa Mambo kubva muiba, nesu atizii pevakamuradzika.”<sup>3</sup> Ndizvo Petro wakabuda noumweni mudzidzi vakaenda kuiba.<sup>4</sup> Zvino vakarumba vari pamwepo, asi mudzidzi umweniwo wakarumba akapindira Petro, naye wakatanga kuguma paiba.<sup>5</sup> Akakotama pashi, akaringira mukati, akaona machira akachena akaradzikwamwo, asi aazi kupindamwo.<sup>6</sup> Ndizvo Simoni Petro wakagumawo, echimuteera, wapotera muiba. Akaona machira akachena akaradzikwa,<sup>7</sup> nedhuku iro raiya rakasungwa musoro mwake, risikazi kuradzikwa pamwepo nemachira akachena, asi raiya rakapetwa riri rega pandau imweni.<sup>8</sup> Ndizvo mudzidzi umweni, uwo wakatanga kuguma paiba, wapoterawo akaona, akatenda.<sup>9</sup> Ngokuti vaiya vasati vazwisisa chinyorwa chinoti unosisira kuti amuke kubva kwevakafa.<sup>10</sup> Ndizvo vadzidzi avo vakaenda kanyi kwavo.<sup>11</sup> Asi Maria wakaema kubanze kweiba echichema. Achachema wakakotama, akaringira muiba,<sup>12</sup> naye wakaona ngirosi mbiri dzakafuka zvachena, dzakagara imwe ngokusoro neimweni ngokutsoka, apo powaiya wakaradzikwa muiri waJesu.<sup>13</sup> Nadzo dzakati kwaari: “Dzimai, unochemenyi?” Wakati kwedziri: “Ngokuti vakadusa Mambo wangu, neni andizii pevakamuradzika.”<sup>14</sup> Apo areketa izvi, wakakunukukira sure, akaona Jesu akaema, asi aazi kuzia kuti ndiJesu.<sup>15</sup> Jesu wakati kwaari: “Dzimai, unochemenyi? Unotsvaka anani?” Aye, echipinimidza kuti waiya murimi, wakati kwaari: “Mambo, kudai wakamudusa kubva pano, ndironzere

powakamuradzika, neni ndimutore.”<sup>16</sup>Jesu wakati kwaari: “Maria!” Wakakunukuka, akati kwaari ngechiHebheru: “Rabboni!” (Ndiwo kuti: Mudzidzisi).<sup>17</sup>Jesu wakati kwaari: “Usandibata, ngokuti andisati ndakwira kuna Baba. Asi enda kunevanun'una vangu, wooti kwavari, 'Ndinokwira kuna Baba angu naBaba enyu, nokunaMwari wangu naMwari wenyu.”<sup>18</sup> Maria Magadhareni wakauya, akaronzera vadzidzi kuti: “Ndaona Mambo,” nokuti wakaereketa izvi kwaari.<sup>19</sup>Zvino madeekoni ezularo rokutanga revhiki, misiwo yakakonywa umwo mwaiya nevadzidzi ngendaa yokutya vaJudha, Jesu wakauya, akaema pakati pavo, akati kwavari: “Kunyarara ngakugare kwomuri.”<sup>20</sup>Naapo areketa izvi, wakavaonisa nyara dzake norutii rwake. Naapo vadzidzi vakadakara apo vaona Mambo.<sup>21</sup>Jesu wakatizve kwavari: “Kunyarara ngakugare kwomuri. Kudai ngezvaakandituma Baba, ngokudaro ndinomutumawo.”<sup>22</sup>Naapo areketa izvi wakavafemera, akati kwavari: “Ashirai Mweya Wakachena.”<sup>23</sup>Kunyazwi ndiani womunozorekerera zvishaishi zvake, zvinozorekererwa; kunyazwi ndiani womusikazorekereri, azvizekererwi.<sup>24</sup>Zvino Thomasi, umwe wegumi navairi, uwo unozwi Manyambiri, waiya asiripo navo apo Jesu paakauya.<sup>25</sup>Ndizvo vadzidzi vamweni vakati kwaari: “Tamuona Mambo.” Asi iye wakati kwavari: “Kuti ndisaona munyara dzake mauri ezvipikiri, ndipfemwo chinwe changu mumauri ezvipikiri, ndipfeke nyara yangu parutii rwake, andizotendi.”<sup>26</sup>Ngesure kwemazuva masere, vadzidzi vaiyazve mumhatso naThomasi waiya navo. Jesu wakauya misiwo yakakonywa, wakaema pakati pavo, wakati: “Kunyarara ngakugare kwomuri.”<sup>27</sup>Zvino wakati kunaThomasi: “Isa chinwe chako apa, uone nyara dzangu; utambanudze nyara yako, uipfeke parutii rwangu. Usaita usikatendi, asi unotenda.”<sup>28</sup>Thomasi wakapingura, akati kwaari: “Mambo wangu naMwari wangu!”<sup>29</sup>Jesu wakati kwaari: “Wazotenda ngokuti wandiona here? Vanomuchena avo vanotenda vasikazi kuona.”<sup>30</sup>Zvino Jesu wakaita mioniso imweni mizhinji mukuona kwevadzidzi vake, isikazi kunyorwa mutsamba iyi.<sup>31</sup>Asi iyi yakanyorwa kuti imwimwi mutende kuti Jesu ndiKristu, Mwana waMwari, nokuti ngokutenda muone kupona ngezina rake.

## 21

<sup>1</sup>Musure maisweswo Jesu wakadzionisazve kuvadzidzi vake pa Mukova rweThibheriasi; naye wakadzionisa ngenjira iyi.  
<sup>2</sup>Vaiya vari pamwepo Simoni Petro naThomasi, unozwi Manyambiri, naNathanaeri, uwo waibva Khana reGarire, nevana vaZebedhi, nevamweni vairi vevadzidzi vake.<sup>3</sup>Simoni Petro wakati kwavari: “Ndinoenda koobata hove.” Vakati kwaari: “Nesu tinoendawo newe.” Vakaenda, vakakwira mungarava, asi usikuhwo avazi kubata chiro.<sup>4</sup>Asi apo kwoita mambakwedza, Jesu wakaema pahumbikumbi, asi vadzidzi avazi kuzia kuti ndiJesu.<sup>5</sup>Ndizvo Jesu wakati kwavari: “Vana, mwabata hove here?” Vakamupingura vechiti: “Haiwa.”<sup>6</sup>Wakati kwavari: “Kandirai rutaa ngokurutii rwokumudyo rwengarava, nemwi munozoona.” Ndizvo vakarukandira, vaiya vasina simba rokurukweya ngendaa yokuwanda kwehove.<sup>7</sup>Ndizvo mudzidzi uwo waaida Jesu wakati kunaPetro: “NdiMambo!” Naapo Simoni Petro azwa kuti ndiMambo, wakasimira jira rake, ngokuti waiya mupunu, wakadzikandira muruandhle.<sup>8</sup>Asi vadzidzi vamweni vakauya vari mungarava, vechikweya rutaa rwakazara ngehove ngokuti vaiya vasiri kuretu nenyika, asi paida kuita zana remamitha.<sup>9</sup>Naapo vaguma kuhumbikumbi, vakaona apo muriro wemasimbe, nehove yakaiswa padera pomuriro, nechingwa.<sup>10</sup>Jesu wakati kwavari: “Unzai dzimweni dzhove dzemwabata zvino.”<sup>11</sup>Simoni Petro wakakwiramwo akakweyera rutaa kuhumbikumbi, rwakazara ngehove huru dzaiya zana nemakumi mashanu nenhatu; kunyazwi dzaiya zhinji kudaro, rutaa aruzi kubauka.<sup>12</sup>Jesu wakati kwavari: “Uyai mudye.” Apana naumwe wevadzidzi waishinga kumubvunza kuti: “ndiwe ani?” Vaizia kuti ndi Mambo.<sup>13</sup>Jesu wakauya, akatora chingwa, akavapa, nehove ngokudaro.<sup>14</sup>Zvino iyi yaiya yaanguva yechitatu yaakadzipangidza Jesu kuvadzidzi, ngesure kwokumuka kwake kwevakafa.<sup>15</sup>Swadaloko vapedza kudya kwemangwanani, Jesu wakati kuna Simoni Petro: “Simoni, mwana waJohani, unondida kupinda ava here?” Wakati kwaari: “Eya, Mambo, unozia kuti ndinokuda.” Wakati kwaari: “Usha vana vemakwai angu.”<sup>16</sup>Wakati kwaarizve ngokwechipiri: “Simoni, mukororo waJohani, unondida yaamho here?” Wakati kwaari: “Eya, Mambo, unozia kuti ndinokuda.” Wakati kwaari: “Ngwarira makwai angu.”<sup>17</sup>Wakati kwaari ngokwechitatu: “Simoni, mwana waJohani, unondida here?” Petro wakarwadziwa mwoyo ngokuti wakati kwaari ngokwechitatu: “Unondida here?” Naye wakati kwaari: “Mambo, iwewe unozia zveshe; unozia kuti ndinokuda.” Jesu wakati kwaari: “Usha makwai angu.”<sup>18</sup>Ngegwiniso ndinoti kwouru, apo uchiri mutsva, waidzisimidza, wechihamba kuenda powaida. Asi apo waa musharuka, unozotambanudza nyara dzako, noumweni unozokusimidza nokukuendesa pousikadi.<sup>19</sup>Jesu wakabua heswi kuti akhombidjire kuti igwanja ripi ringafa ndirona Pedro kuti anaswe ndi Mwari.<sup>20</sup>ngokudalo paakabua iswi, wakati kuna pedro: nditeere.<sup>20</sup>ngokudalo Petro echimuona wakati kunaJesu: “Mambo, uyukee, unozoitenyi?”<sup>21</sup>Ndizvo Petro echikunukukira sure, wakaona mudzidzi uwo waaida Jesu echimuteera, aye waiya akatseama paditi rake pakudya kwemadeekoni, uwozve wakati: “Mambo, ndiani unozokupira?”<sup>22</sup>Jesu wakati kwaari, “Kudai ndechida kuti agare kuswikira ndiviye, swinoita here ? Nditeere iwewe!”<sup>23</sup>ngokudalo wakazoshambazira mashoko haia kuhama djake, kuti mudzidzisi wia aazifi. ngokudalo, Jesu aato kuvunja kuna pedro kuti mudzidzi umweni aazofi, ngokudalo wakazoti: ndikaswida kuti agale kuswikira ndivie, unondava naswo here?<sup>24</sup>Uyu ndiye mudzidzi uwo unopupura ngahaia magwalo, nowakanyora izvi zviro, nesu tinoziva kuti chapupu chake ngechegwiniso.<sup>25</sup>Asi zviripo zvimweni zvizhinji zvaakaita Jesu; kudai zvakanorwa chimwe ngachimwe chazvo, ndinoti pamweni nenyika yemene ainga emeri tsamba dzinganyorwa.